




ル 6
437
15

第十五冊
卷之三十二
人物
卷之三十三
人物



盛京通志卷之三十二

人物

自古偉人奇士山川靈氣之所鍾也長白巫閭雄秀
挺拔固宜鍾是氣者磊落英多何至遼金以後人材
始革出哉蓋明良相遇運會使之然也我

朝茂膺

天眷肇社營州河山帶礪黼黻休隆者大抵皆天潢長白之

彥川嶽效靈茲為極盛而

聖天子久道化成遼海之間人才蔚起更有不可勝紀者

國史鄉評將並採焉

門 呂
號 487
卷 15

漢

王閎

樂浪誦那人仲七世孫東漢初爲郡三老更始敗土人王調殺郡守劉憲自稱大將軍樂浪太守建武六年光武遣太守王遵將兵擊之至遼東閎與郡曹史楊邑等共殺調迎遵皆封爲列侯閎獨讓爵帝竒而徵之道病卒

王景

字仲通閎之子少學易遂廣闕衆書又好天文術數顯宗時有薦景能理水者詔與將作謁者王吳共修

浚儀渠吳用景塢流法水乃不復爲害永平十二年議修汴渠引景問理水形便賜景山海經河渠書禹貢圖發卒數十萬遣景與王吳治渠防起營陽至於千乘海口千餘里景度地勢鑿山截澗隄遏衝要疏決壅積十里立一水門令水更相迴注無復潰漏之患堤成遷御史建初八年遷廬江太守先是百姓不知牛耕景至查郡界有楚孫叔敖所起芍陂稻田乃驅率吏民修起蕪廢教用犁耕由是墾闢倍多境內豐給又訓令蠶織爲作法制初景以六經所載皆有卜筮而衆書錯糅吉凶相反乃叅紀數術文書家宅

禁忌堪輿日相之屬適於事用者集於大衍元基云

李久

遼東人安帝時海賊張伯路寇東萊為青州刺史法
雄所破逃還遼東久率鄉勇等共斬之遼地以寧

公孫度

字升濟遼東襄平人初為元菟吏後舉有道累官遼
東太守東伐高句驪西擊烏桓南越海取東萊諸縣
威行海外自號平州牧子康嗣封襄平侯

三國

公孫恭

康之弟繼康為遼東太守魏文帝拜為車騎將軍封

平郭侯

按三國志恭為人劣弱不能治國為淵所奪
前志以恭封侯載入人物其實無他長也

晉

李允

字宣伯遼東襄平人父信早喪允有識之後即以喪
禮自居又以祖敏浮海不知所終設木主事之舉孝
廉參北軍事遷樂平侯相政尚清簡入為吏部郎銓
綜廉平賜爵關中侯遷御史中丞恭恪直繩百官憚
之泰始初拜尚書轉太子少傅拜侍中加特進俄遷
尚書令允雖歷職內外見病貧無以市藥帝聞賜錢

十萬詔拜司徒簡亮持重稱為任職卒諡曰成孫志嗣爵

高 詡

遼東人善天文有權畧永嘉之亂避地隱居建武初慕容廆收攬豪傑詡杖策見之曰霸王之資非義不濟今晉室雖微人心猶附宜遣使江東示有所尊廆卽遣長史王濟浮海詣建康勸進後廆承制以詡爲郎中令及皝嗣立進詡元菟太守皝破慕容仁復遼東欲盡坑其民詡諫止之皝又謀伐宇文逸豆歸詡曰必克但不於將及進戰克之詡中流矢卒

統

遼東人據樂浪帶方二城與高句驪主乙弗利相攻連年樂浪王遵說統歸廆廆爲之置樂浪郡遵叅軍事後高句驪將如奴子據于河城寇掠遼東統掩擊擒之

韓 壽

遼東人太興二年慕容廆進據棘城宇文大人悉獨官率衆十萬逼城廆使召其子翰于徒河翰請於廆曰宜爲奇兵於外伺其間而擊之若合兵爲一使得專意攻城非策之得且示衆以怯恐士氣不戰自沮

鹿猶疑之壽進言曰悉獨官有憑陵之志將驕卒惰軍不堅固若奇兵卒起掎其無備必破之矣乃聽翰留徒河翰果出奇兵與鹿破悉獨官悉俘其衆

南北朝

安同

遼東人其先祖曰世高漢時以安息王侍子入洛歷魏至晉避亂遼東同性端嚴明惠好長者之言登國初魏道武徵兵於慕容垂同奉使稱旨從征姚平進計截汾曲爲南北浮橋乘西岸築圍姚興至遂不能救以功封北新侯明元卽位命同持節循察并定二

州郡國肅然及太武監國以同與長孫嵩奚斤崔宏等八人共聽政同在官明察長於校練家法修整爲世所稱卒贈高陽王諡恭惠

屈遵

字子皮徒河人博學多譽名著當時歸魏太祖拜中書令出納王言兼總文誥賜爵下蔡子

安難

同之子有巧思初從杜超南伐以功爲清河太守世祖時諸將頻征和龍皆以難爲長史鑿山堙谷省力兼功遷給事中復以軍功賜爵清河子

安原

同之子雅性矜嚴沉勇多智魏明元時鎮雲中寬和愛下甚得衆心蠕蠕犯塞輒摧破之賜爵武原侯太武卽位拜駕部尚書進爵河間公

安頡

原之弟辨慧多策畧初爲內侍長令察舉百僚糾刺無所避宜城王奚斤追夏主赫連昌至安定馬疫糧乏爲所敗頡時爲監軍欲決死戰斤言馬少欲待救一騎頡曰兵疲力屈士有饑色不一決戰則死在旦夕何救之可待等死當戰死可坐受困乎斤猶不從頡

與尉眷等謀選騎待之昌來攻壘頡出力戰擒昌送京師賜爵西平公攻宋拔洛陽潰虎牢招降萬餘頡爲將善綏士衆及卒降者無不嘆惜神麌四年贈王爵諡曰襄

屈垣

字長生遵之孫太宗時以破平涼功賜爵濟北公恭宗在東宮垣領太子少傅內外稱平世祖委以大政車駕出征常居中留鎮

盧魯元

徒河人寬和有雅度魏明元時以忠謹給侍東宮太

武親愛之及卽位以爲中書侍郎魯元益謹肅性多
容納與人交掩過揚美太祖征赫連昌親追入其城
魯元隨以出入有保護功遷太保錄尚書事卒贈襄

城王

按徒河城在今廣寧中屯衛故地南北史及魏書皆以徒河繫昌黎彼時昌黎尚在邊外非卽

永平之昌黎也故凡徒河人物應採入錦州府

高道悅

子顯族附

字文欣遼東新昌人曾祖策馮跋散騎常侍新昌侯
道悅魏諫議大夫正色當官不憚強禦太和間車駕
將由水路幸鄴已詔都水回營構之材以造舟楫道
悅表諫以爲闕居宇之功作游嬉之用損耗殊倍又

深薄之危古今共慎于是高祖遂從陸路長子顯族
拜給事中亦以忠厚見稱

李元護

遼東襄平人晉司徒允八世孫少有武力軀幹雄偉
鬚長二尺以魏平齊後隨父懷慶南奔爲裴叔業司
馬叔業歸魏元護贊成之魏景明初爲齊州刺史封

廣饒伯州內饑儉表請振貸蠲其賦役

按前志李元

祥潘樂二人攷史志乃今朔平府之廣寧石門人今刪去

高崇

字積善父潛自高麗歸魏賜爵開陽男居遼東崇少

聰敏以端謹稱景明中襲父爵除洛陽令爲政清斷
發摘不避強禦縣內肅然嘗謂人曰仲尼四科德行
爲首人能立身約已不忘典訓斯亦足矣卒諡曰成
高謙之

字道讓崇之子少事後母以孝聞及長專意經史天
文算曆之書多所該涉襲父爵孝昌初行河陰令有
囊瓦礫詐市人馬者逸去謙之僞枷囚於市宣言是
詐馬賊今欲刑之遣腹心密察市中有二人相見訐
然曰無復憂矣遂執之悉獲其黨尋正河陰令損益
治體多爲故事除國子博士與袁翻常景酈道元温

子昇等咸申款舊好施贍恤言諾無虧以父舅氏沮
渠蒙遜曾據涼土國書漏缺乃修涼書十卷行於世
高恭之

字道穆謙之弟少聰敏學涉經史所交皆名儁幼孤
事兄如父母正光中爲御史糾摘不避權豪孝莊卽
位除太尉長史加前將軍及元灑逼虎牢或勸孝莊
赴關西道穆曰關中荒殘何由可往今宜循河東下
號詔諸軍一向虎牢一赴河內爲犄角勢莊帝從之
夜至河內郡北令恭之作詔書布告遠近于是四方
知乘輿所在莊帝反政除御史中尉恭之外執直繩

內參機密凡益國利人之事必以奏聞諫爭無所顧
憚選用御史皆當世名輩

豆盧寧

徒河人驍果善射魏永安中從破万俟醜奴賜爵靈
壽男又擒寶泰破稽胡戰芒山皆有功進范陽郡公
周保定四年卒初寧無子養弟永恩子勣及生子讚
親屬皆請讚爲嗣寧曰兄弟之子猶子也終不易時
以此多之

豆盧勣

字定東寧之姪嗣寧爵授左武伯中大夫自以經業

未通請解職遊露門學敕以本官就學武帝嗣位爲
涇州刺史甚有惠政烏鼠山絕壁千尋由來乏水勣
馬足所踐忽踊飛泉又有白鳥乳于庭前人爲之謠
曰我有丹陽山出玉漿濟我人夷神鳥來翔因號其
泉曰玉漿泉

李弼

字景和遼東襄平人六世祖根慕容垂黃門侍郎祖
貴醜平州刺史父永太中大夫弼少有大志膂力過
人屬魏室喪亂嘗云大丈夫會須平寇難安社稷以
取功名安能籍階資求榮位乎魏永安元年從爾朱

天光討破赤水蜀以功封石門縣伯又與賀拔岳討
 万俟醜奴万俟道洛王慶雲皆破之弼恒先鋒陷陣
 賊咸畏之曰莫當李將軍天光赴洛弼因隸侯莫陳
 悅太昌初除南秦州刺史隨悅征討屢捷及悅害賀
 拔岳周太祖宇文泰討悅弼勒所部歸泰仍令弼以
 本官鎮原州大統中從平寶泰又從平弘農與齊神
 武戰於沙苑以功拜特進十四年討北稽胡平之遷
 太保加柱國大將軍孝閔踐阼封趙國公弼每征討
 朝受命夕使引路畧不問私事兼性沉雄有深識故
 能以功名終卒年六十四諡曰武配食太祖廟庭

按李

延壽北史以弼為隴西成紀人蓋本其初而言之

李 樹

弼之弟字靈傑長不盈五尺性果決有膽氣為周文
 帝帳內都督從復弘農破沙苑樹驕馬運矛衝堅陷
 陣敵人見之皆避周文初亦聞樹驍悍至是方嗟歎
 之謂曰但使膽決如此何必八尺之軀也武成初從
 豆盧寧征稽胡有功封汝南郡公

高子儒

字孝禮崇之孫元顥入洛莊帝北巡子儒踰河至行
 宮備陳元顥敗在旦夕莊帝以為大慰已意授秘書

郎進司徒中兵叅軍襲爵興和中四方多有流民子
儒爲梁州北豫西兗三州檢戶使安集甚衆

寶 瑗

字世珍遼西遼陽人本出扶風平陵漢大將軍武曾
孫崇爲遼西太守遂家焉瑗仕魏爲太常博士從爾
朱榮東平葛榮封容城伯乞以封讓兄叔珍宣武時
爲廷尉卿及釋奠開講與温子昇魏季景李業興並
爲摘句天平中除廣宗太守有清白稱轉中山太守
爲吏民所懷累遷至大中正兼廷尉卿貧窘如布衣
齊獻武王班書州郡常稱瑗政績以爲勸勵卒諡曰

明

李 綸

弼之子有文武才以功臣子居顯職歷吏部內史下
大夫並獲當官之譽位至司會中大夫封河陽郡公
可朱渾元

字道元遼東人寬仁有武畧少與齊神武相知後從
爾朱天光平万俟醜奴等有功爲宇文泰所疑遂歸
神武累功拜司空封扶風郡王元用兵務持重未嘗
負敗皇建初配享文襄廟廷道元弟天元亦有將畧
便弓馬封昌陽縣伯天保初位尚書卒諡恭武

隋

李衍

字拔豆父弼為周太師衍少專武藝慷慨有志畧仕隋以行軍總管討叛蠻平之進柱國後以伐陳功拜安州總管頗有惠政

李寬

弼之孫邢國公輝之子幹畧過人自周及隋數經將領位柱國蒲山郡公號為名將子密當隋之亂有縱橫才唐與密降復叛遂見殺

度地稽

粟末人本白山渠帥煬帝時窘於高麗因帥所部降拜右光祿大夫居之柳城及遼東之役從戰有功十三年從幸江都尋放還柳城為李密所邀前後十餘戰僅而得免按唐書隋度地稽即唐之突地稽

唐

李謹行

靺鞨人父突地稽初事隋及唐武德初奉朝貢授總管以戰功封耆國公貞觀初進右衛將軍賜姓李謹行偉容貌勇冠軍中累遷營州都督高宗時破高麗於發盧河之西妻劉氏亦以伐奴城功封燕國夫人

上元元年發兵討新羅以謹行爲安東鎮撫大使三戰皆捷新羅乃入貢謝罪三年破吐蕃于青海封燕國公卒贈幽州都督陪葬乾陵

李楷洛

營州柳城人本契丹渠帥中宗時累官左羽林大將軍封薊郡公吐蕃寇河源楷洛擊走之初行謂人曰

賊平吾不歸矣師還卒於道諡忠烈

按柳城本今錦州府境內地唐

聖曆二年僑治漁陽開元五年又還治柳城故李楷洛等以契丹渠帥可附近而居應採人錦州人物志

內詳見古蹟

李多祚

其先靺鞨人號黃頭都督入中國多祚乃其後裔累軍功遷右鷹揚大將軍室韋及孫萬榮之叛命多祚進討以勞改右羽林大將軍領北門衛兵張柬之將誅二張以多祚素感槩可動以義就與定謀多祚泣數行下引天地以自誓遂與王同皎李湛等共誅易之昌宗中宗復位封多祚遼陽郡王

李惠登

柳城人爲平盧軍裨將安祿山亂從董秦泛海畧定滄棣等州輕兵遠鬪賊不支戰輒北史思明反惠登陷賊中以計得脫依來滇及李希烈反以兵二千使

屯隋州惠登摯州歸朝卽拜隋州刺史居二十年興利去害田闢戶增人歌舞之節度使于頔上其績詔加御史大夫

李澄

遼東襄平人蒲山公寬之裔德宗時爲滑州刺史李希烈陷汴滑州亦降興元初澄自永平遣盧融問道奉表詣行在德宗嘉之署帛詔納蠟丸授澄刑部尚書汴滑節度使澄密勒訓士馬以計誅希烈養子之戍白馬者及希烈悉衆圍陳州澄遂引兵歸國貞元初遷檢校尚書左僕射義成軍節度使封隴西王卒

贈司空

李光弼

柳城人楷洛子嚴毅沉果有大畧善騎射襲父封以破吐蕃吐谷渾功進雲麾將軍安祿山反郭子儀薦其能詔加魏郡太守河北採訪使光弼以朔方兵五千東救常山降思義又却賊于饒陽會郭子儀守雲中詔悉衆出井陘與光弼合擊史思明于九門西大敗之及拔趙郡士多擄掠光弼坐譙門收所獲還之民至德二載思明等將兵十萬攻光弼于太原時麾下兵不滿萬光弼徹屋爲柵石車石所擊輒傷賊思

明爲飛樓障以木幔築土山臨城光弼遣人穴地頽之又時遣突騎出乘賊俘斬萬計思明乃遁去乾元初九節度師潰于相州光弼整衆還太原未幾爲天下兵馬大元帥賊方闕洛光弼悉軍趣河陽安太清攻北城光弼將出戰先內刀于韉曰戰危事吾位三公不可辱于賊萬有不捷當自刎於是諸軍爭奮賊衆奔敗追擒太清於懷州廣德元年擒浙東賊袁晁賜鐵券圖形凌煙閣光弼知兵善用人謀定後戰能以少覆衆初與郭子儀齊名而戰功推中興第一卒贈太保諡武穆

思禮

高麗人入居營州初事哥舒翰以功授右衛將軍安祿山反思禮勸翰表誅楊國忠翰不從潼關失守思禮走行在及收東京戰數有功封霍國公乾元初討安慶緒九節度之師潰于相州惟思禮與李光弼全軍還光弼徙河陽代爲河東節度副大使在鎮器甲完精儲粟至百萬斛奏輸其半於京師卒諡武烈侯希逸

營州人天寶末爲州禪將安祿山叛以其親將爲平盧節度使希逸率兵與安東都護王元志斬之數擊

賊有功以孤軍無援浮海保青州寶應初平史朝義
加檢校工部尚書圖形凌煙閣

李 瓘

渤海靺鞨人本姓茹父懷光爲朔方將以功賜姓李
建中四年朱泚圍奉天懷光入援倍道至河東敗泚
兵於醴泉又敗賊於魯店泚解圍去功高威重爲盧
杞所忌屯咸陽不進瓘時爲監察御史密言於德宗
曰臣父必負陛下願早爲備德宗驚曰然則卿以何
策自免曰臣之進言非苟求生臣父敗則臣與俱死
矣使臣賣父求生陛下亦安用之及懷光死瓘亦自

李 彙

光弼子有志操廉潔自矢元和初分徐州符離爲宿
州以光弼有遺愛擢彙爲刺史後遷涇原節度罷軍
中雜徭出俸錢贖將士質賣子還其家卒贈工部尚
書

遼

述 瀾

德祖之弟北征于厥室韋南畧易定奚霫始興板築
置城邑教民種桑麻習織組已有廣土衆民之志

耶律曷魯

字洪隱迭刺部人髻髻與太祖遊從父釋魯奇之曰
 興吾家者必二兒也後太祖亦知曷魯賢軍國事非
 曷魯議不行討越兀與烏古部說降奚部擊降室韋
 皆有功及太祖即位以曷魯為迭刺夷堇時民更兵
 焚剽日以抗敵曷魯撫輯有方畜牧益滋民用富庶
 太祖受尊號以曷魯為阿魯敦于越卒立石紀功清
 寧間命立祠上京太祖二十一功臣各有擬以曷魯
 為心史臣以為君臣相得之誠庶吳漢之于光武云
 耶律斜涅赤

字撒刺太祖即位掌腹心部撫輯西域討平渤海居
 佐命功臣之一

耶律倍

字圖欲太祖長子幼聰敏好學外寬內摯太祖問事
 天敬神孰先倍答曰孔子大聖萬世所尊太祖悅即
 建孔子廟隨立倍為太子天顯初從征渤海大譴誤
 請降收其國曰東丹名其城曰天福以倍為人皇王
 主之太祖薨倍知皇太后欲立德光因以位讓之太
 宗城東平號南京徙倍居之盡遷其民唐明宗遣人
 跨海密召倍遂浮海至汴倍雖在異國常思其親問

安之使不絕後明宗養子從珂篡殺倍密疏達太宗請討之及太宗立石敬瑭爲帝加兵于洛從珂遂殺倍太宗迎其柩歸葬醫巫閭山世宗卽位諡讓國皇帝重熙中增諡爲文獻欽義皇帝

耶律朔古

字彌骨頂從伐渤海有功天顯七年授三河烏古部都詳穩平易近民民安之以故久于其任

詳穩諸官府監治官

耶律屋質

字敵輦姿簡靜有器識知天文會同間爲惕隱太宗崩諸大臣立世宗太后怒甚遣皇子李胡以兵

屋質從中和解之兵乃罷天祿三年表列察割陰謀事世宗不聽遂爲所弑屋質討平之穆宗卽位謂屋質曰朕之性命實出卿手命知國事後以援太原功加于越卒道宗時詔上京爲立祠樹碑紀功惕隱

耶律吼

字曷魯六院部夷離堇蒲古只之後端懿好施不事生產會同六年爲南院大王莅事精簡太宗崩於樂城吼與耶律哇定策立世宗以功加採訪使賜以寶貨辭曰臣位已高敢復求富臣從弟的臻諸子坐事籍沒陛下哀而出之受賜多矣世宗曰吼舍重賞以

族人爲請其賢遠甚時有取當世名流作七賢傳者
吼與其一

高模翰

渤海人有膂力善騎射唐攻太原石敬瑭遣人求救
模翰力戰有功太宗嘗諭模翰曰朕自起兵百餘戰
卿功第一雖古名將無以過乃授上將軍及石晉背
盟模翰爲統軍副使下關南城邑數十與趙延壽議
救楊覃於乾寧軍俄有光自模翰目中出縈繞旗矛
燄燄如流星模翰曰此天贊之祥遂進兵屢勝封開
國公遷鎮中京天祿二年加開府儀同三司賜對衣

鞍勒名馬應曆初召爲中臺省右相至東京父老歡
迎曰公起戎行致富貴爲鄉里榮相如買臣輩不足
過也九年遷左相卒

耶律安搏

迭里之子先是太祖崩淳欽皇后稱制欲以大元帥
德光嗣位迭里言嫡長東丹王赴朝當立由是忤旨
見殺籍其家安搏幼居父喪哀毀過禮見者傷之旣
長寡言笑重然諾事母至孝以父死非罪未葬不預
宴樂及長直宿衛太宗伐晉還至欒城崩諸將欲立
世宗得安搏言而決進北院樞密使史臣曰太宗崩

非安搏吼哇謀而能斷非屋質直而能諫杜太后之私以成橫渡之約則亂將誰定四臣者庶幾春秋首止之功

耶律撻烈

字涅魯哀沉厚多智有任重才應曆初為南院大王均賦役勸耕稼部人化之戶口豐殖及為行軍都統賞罰明信得士卒心在治所久年穀屢稔時耶律屋質居北院撻烈居南院俱有政迹朝議以為富民大

王云

遼人字多用三字如涅魯哀阿古真之類是也

耶律道隱

倍之次子倍在唐為唐明宗所害洛陽僧匿而養之因名道隱太宗滅唐還京詔賜外羅山居焉惟沉靜有文武才景宗時封蜀王為上京留守乾亨元年遷守南京號令嚴肅民獲安業統和初卒追封晉王

耶律賢適

字阿古真嗜學有志于越屋質器重之景宗立以功加檢校太保保寧二年拜北院樞密使兼侍中遷西北路兵馬都部署賢適忠介膚敏推誠待人雖燕息不忘政務以故百司首職罔敢媮墮累年滯獄悉剖決之乾統初封西平郡王

耶律合住

字粘袞初以近族入侍從征有功保寧初拜西南兵馬都監招安巡檢等使久任邊防不妄啟釁鄰壤敬畏屬部又安宋數遣人結歡合住表聞遂許議和安邊懷敵多有力焉鎮范陽時嘗領數騎徑詣雄州北門與郡將立馬陳兩國利害及周師侵邊本末辭氣慷慨自是邊境數年無事識者謂合住一言賢於數十萬兵

耶律阿沒里

字蒲鄰統和初以征高麗功遷北院宣徽使加政事

令先是叛逆之家兄弟不知情者亦連坐阿沒里諫曰兄弟雖同胞賦性各異一行逆謀雖不與知輒坐以法是刑及無罪也自今雖同居兄弟不知情者免連坐著爲令

耶律海里

字留隱性儉素不喜聲利保寧中爲南院大夫有却敵功帝屢親征海里在南院十餘年鎮以寬靜戶口增給封漆水郡王遷上京留守卒家貧詔給葬具

耶律速撒

字阿敏性忠直簡毅練武事歷霸濟祥順聖五州都

盛京通志 卷之三十一 三
總管保寧三年改九部都詳穩屢立戰功凡臨戎與
士卒同甘苦所獲均賜將校賞順討逆威信大振
耶律休哥

字遜寧少有公輔器乾亨初將兵救南京與宋戰于
高梁河及瓦橋關皆有功聖宗卽位太后稱制令休
哥總南面軍務休哥均戍兵立更休法勸農桑修武
備省賦役恤孤寡戒戍兵無犯宋境雖馬牛逸于北
者悉還之遠近向化邊鄙以安休哥智畧宏遠料敵
如神每戰勝讓功諸將故士卒樂爲之用身更百戰
未嘗殺一無辜及卒詔立祠南京

耶律學古

字乙辛隱穎悟好學工詩乾亨元年宋旣下河東乘
勝侵燕學古受詔往援有全城功二年進彰國軍節
度使時南境未靜民思休息學古與宋將潘美各守
邊約無相侵軼民獲安業

耶律斜軫

字韓隱保寧初蕭思溫薦斜軫有經國才召問時政
占對愷切高梁之戰斜軫與休哥最有功統和初敗
宋將潘美等于飛狐口擒楊無敵于狼牙村以功加
守太保卒於軍

耶律瑤質

字拔里董積慶宮人篤學廉介有經世志統和十年遷積慶宮使時有獻替多見採納聖宗征高麗破康肇軍于銅州瑤質之力居多擢拜四蕃部詳穩戢暴懷善政積顯著

耶律題子

字聖隱善射工畫統和四年宋將楊繼業陷山西城邑題子從耶律斜軫擊之敗賀令圖于定安斜軫擒繼業題子功居多初題子破令圖宋將有因傷而仆者題子繪其狀以示宋人咸嗟神妙

耶律資忠

字沃衍博學工詞章聖宗知其賢召補宿衛數問以古今治亂資忠對無隱開泰初授中丞眷遇日隆四年使高麗見留資忠每懷君親輒有著述號西亭集九年高麗謝罪遣資忠還帝郊迎同載歸官林牙知惕隱事以不附權貴出爲節度使

林牙掌文翰官郡牧所政止掌部言

耶律宜新

重熙間從蕭惠討西夏惠敗績宜新一軍獨全拜北院大王

耶律韓留

字速寧有明識篤行義工爲詩開泰三年稍遷烏古
敵烈部都監俄知詳穩事敵烈部叛從耶律世良討
平之重熙元年同知上京留守以性不苟合爲樞密
使蕭解里所忌四年始召爲北面林牙進述懷詩興
宗嘉嘆尋卒

大康父

渤海人開泰間累官南府宰相出知黃龍府善撫綏
東郡懷服

耶律僕里篤

字燕隱開泰間爲本班郎君有捕盜功累遷知興中
府以獄空聞太平十九年夏人侵金肅軍敗之加右
武衛上將軍時近邊羣牧數被寇掠遷倒塌嶺都監
以治之桴鼓不鳴清寧初歷長寧歸義二軍節度使
致仕

蕭朴

字延寧幼如老成人及長博學多智開泰中任南面
林牙帝問以政朴具陳百姓疾苦國用豐耗帝悅擢
左夷離畢太平中加中書令及大延琳叛詔安撫東
京興宗卽位仁德皇后以馮家奴所誣被害朴屢言
其冤不報每念至此爲之嘔血重熙初拜東京留守

卒贈齊王 夷离畢參知政事掌刑政

蕭韓家奴

字括寧性孝友太平中累遷至奚六部大王治有聲清寧中封蘭陵郡王九年道宗獵太子山韓家奴聞重元亂馳詣行在道宗倉卒欲避于北南大王院韓家奴與耶律仁先執轡固諫乃止重元復誘奚獵夫來戰韓家奴諭降之重元遂敗大康初乙辛構陷太子濬幽于上京韓家奴力言其冤不報 按遼史有兩蕭韓家奴今分載名宦人物志中

夏行美

渤海人太平間總渤海軍平保州大廷林使人說與俱反行美執之復殺其黨延林謀沮嬰城自守數月而破超遷行美平章事忠順軍節度使累遷副部署致仕

耶律韓八

字嘲隱太平中游京師帝微服出獵與語知有長才陰識之會南京疑獄久不決召韓八馳驛審錄人無冤者帝嘉之重熙六年為北院大王政務寬仁知無不言卒之日篋無舊蓄施無新衣遣使弔祭給葬具耶律庶成

字喜隱幼好學書過目不忘善遼漢文字于詩尤工
重熙初累遷樞密直學士與蕭韓家奴各進四時逸
樂賦帝嗟賞與撰實錄禮書修定法令有詩文及譯
方脉書行於世

耶律玦

字吾展重熙初皇弟秦國王爲遼興軍節度使以玦
同知使事多所匡正咸雍初秦國王爲西京留守請
玦爲佐歲中獄空者三召爲孟父房敞隱帝知其貧
賜宮戶十嘗謂宰相曰契丹忠正無如玦者漢人則
劉仲而已

耶律侯西

字禿寧初爲西南巡邊官以廉潔稱重熙十一年徙
東京留守與知府蕭歐里斯討蒲盧毛朶部有功加
兼侍中致仕

耶律鐸軫

字敵輦積慶宮人重熙間歷東路統軍使及西征詔
鐸軫率兵由別道進會于河濱大捷歸上親賜卮酒
手書鐸軫衣裾日勤國忠君舉世無雙

耶律良

字習然生於乾州讀書醫巫間山重熙中補起居注

清寧中上幸鴨子河作捕魚賦遷知制誥兼知部署
司事奏請編御製詩文目曰清寧集上命良詩爲慶
會集親製其序重元謀亂良發其事以功遷漢人行
宮都部署咸雍初同知南院樞密使爲惕隱出知中
京留守追封遼西郡王諡忠成

耶律頗的

字撒版孤介寡合重熙初補牌印郎君清寧初稍遷
知易州去官部民請留許之大康中封吳國公爲北
院樞密使廉謹奉公知無不爲大安中致仕

姚景行

興中縣人重熙進士累官翰林學士參知政事敦厚
廉直人望歸之道宗卽位爲北府宰相九年秋告歸
道聞重元亂收集行旅得三百餘騎勤王比至賊已
平道宗嘉其忠咸雍元年出爲武定軍節度使減徭
役疏寃滯廣儲蓄以備荒勤校閱以修武郡民宜之
明年召拜南院樞密使道宗欲伐宋問景行曰宋人
好生邊事如何對曰自聖宗皇帝以威德懷遠幾六
十年若以細故用兵恐違先帝成約道宗乃止大康
中以上京多滯獄命爲留守數月疏理無遺及卒追
封柳城郡王諡文憲壽隆五年詔爲立祠

耶律仁先

字紉鄰秀爽有智畧重熙十八年任東京留守女直恃險侵掠不止仁先乞開山通道以控制之邊民安業清寧中拜南院樞密使重元叛犯灤河帷宮道宗委仁先討賊乃輟車爲營拆行馬作兵仗亟召五院部蕭塔刺乘便奮擊重元遁去加尚父進封宋王耶律乙辛陰險不法仁先抑之由是見忌出爲南京留守恤孤笑禁姦慝議者以爲自休哥後仁先一人而已

耶律義先

仁先弟重熙十三年西征以功進南院宣徽使時蕭革同知樞密院席寵擅權義先因侍讌言于上曰革狡佞喜亂必誤國家上不納他日侍宴上命羣臣博義先當與革對憮然曰臣縱不能進賢退不肖安能與國賊戲終不與博十六年爲殿前都點檢討蒲奴里擒其渠帥改南京統軍使封武昌郡王奏請統軍司錢營息以贍貧民民得休息軍器完整義先常戒族人曰國中三父房皆帝之昆弟不孝不義尤不可爲妻晉國長公主之女每遇中表親非禮服不見內外多化之

耶律合里只

字持滿重熙中累遷西南面招討都監清寧七年入
爲北院大王封幽國公歷遼興軍節度使東北路詳
穩明達勒恪懷柔有道置諸賓館及西遼營田皆白
合里只發之

耶律鐸魯幹

字乙辛隱廉約重義咸雍中累遷同知南京留守被
召部民懇留賜詔褒獎歷南府宰相致仕鐸魯幹所
至有聲吏民畏愛及退居子普古爲烏古部節度使
遣人來迎旣至見委積甚富曰辭親入仕當以裕國

安民爲事枉道欺君以苟貨利非吾志也竟命駕歸
普古後爲盜所殺

耶律蒲魯

字乃展聰悟好學博通經籍契丹人舉進士自蒲魯
始除牌印郎君應詔賦詩立成景宗嘉賞顧左右曰
文才如此必不能武事會從獵蒲魯三矢中三兔景
宗竒之轉通進父庶箴嘗寄戒諭詩蒲魯答以賦世
稱典雅

竇景庸

中京人清寧進士大安初監修國史封陳國公授武

定軍節度使招流亡戢奸猾決冤獄輕重大小務愜人心七年拜中京留守卒諡肅憲

馬人望

字儼叔遼東醫巫閭山人祖淵中京副留守父詮中京文思使人望由進士爲松山縣令時歲運澤州官炭獨役松山人望請于中京留守蕭吐渾均役他邑調涿州新城縣吏民畏愛擢中京度支司鹽鐵判官轉南京三司度支判官公私兼裕遷警巡使京城獄訟填委人望剖決無一寃者會檢括戶口未兩旬而舉同知留守蕭保先問故人望曰民產若括之無遺

他日必滋厚歛之弊大率十得六七足矣保先曰公慮遠吾不及也拜參知政事南院樞密使人不敢干以私用人必公議所當與者如曹勇義虞仲文人望推薦皆爲名臣時民所甚患如驛遞馬牛旗鼓鄉正廳隸倉司之役至破產不能給人望使人出錢官自募役時以爲便卒諡文獻人望有操守喜怒不形未嘗附麗求進初除執政人賀之人望愀然曰得勿喜失勿憂抗之甚高擠之必酷其畏慎如此

大公鼎

渤海人占籍遼陽率賓縣幼莊愿長而好學由進士

調瀋州觀察判官時遼東淫雨傷稼趨發瀕河丁壯
修隄防公鼎曰邊障甫寧大興工役非利國便農之
道上疏乞罷水亦不爲災改良鄉令省徭役務農桑
建孔子廟學部民服化遷大理卿多所平反天祚卽
位遷東京戶部使時盜殺留守蕭保先因而倡亂公
鼎單騎行郡陳以禍福衆輯如故獨捕首亂者誅之
拜中京留守時盜賊充斥有遇公鼎于路者卽叩馬
乞自新不旬日境內清肅

耶律撒剌

字董隱性忠直沉厚咸雍九年爲契丹行營都部署

大康二年欲復召耶律乙辛撒剌獨奏曰蕭巖壽言
乙辛有罪不可爲樞臣故出之今復召恐天下生疑
三諫不納遂爲乙辛誣陷而死乾統初追封漆水郡
王與蕭巖壽等並繪像宜福殿

耶律孟簡

字復易六歲父劉家奴晨出獵俾賦曉天星月詩孟
簡應聲而成大康初樞密使乙辛以姦險竊柄出爲
中京留守孟簡與耶律庶箴表賀未幾乙辛復職孟
簡遂見謫明年流保州以義命自安及釋歸詣闕上
表請修國史上命置局編修孟簡謂餘官曰史筆天

下之大信一言當否百世從之苟無明識好惡徇情則禍不測可不慎歟乾統中遷六院部太保處事不拘文法時笑其迂孟簡聞之曰上古之時無簿書法令而天下治簿書法令豈聖人致治之本乎後改高州觀察使修學校招生徒遷昭德軍節度使

耶律那也

字移斯輦父幹常爲北剋從伐夏戰歿那也方九歲加諸衛小將軍大安九年爲倒塌嶺節度使壽隆初討達里拔思等有功改烏古敵烈部統軍使邊境以寧秩滿部民乞留詔許再任那也廉介長于理民每

有鬪訟親覈曲直不尚威嚴常曰凡治人本欲分別

是非何事迫脅故所至以惠化稱

北剋猶言北軍

耶律棠古

字蒲速宛大康中累遷至大將軍性坦白好別白黑人有不善必盡言無隱時號強棠古在朝數論宰相得失由是屢見廢黜天慶初烏古敵烈叛召拜烏古節度使至部諭降之遂出私財及發富民積以振困乏部民大悅保太元年致仕天祚出奔棠古謁于倒塌嶺復拜烏古部節度使擊破敵烈之衆

耶律淵

臨潢長壽人在奉聖州磬山監淵課耕稼勞來有方在軍十有五年與士卒同甘苦未嘗妄答一人比休致親已歿卽於縣西卜地以葬因家磬山哭必盡哀祭必盡敬人皆化之

張琳

瀋州人幼有志節壽隆末爲秘書中允天祚卽位歷遷至南府宰相及中京陷天祚幸雲中留琳與李處溫佐魏王耶律淳守南京處溫父子欲立淳爲帝琳阻之曰王雖帝胄初無上命攝政則可卽眞則不可處溫卒立淳琳不與政鬱悒而卒

盛京通志卷之三十二

盛京通志卷之三十三

人物

金

擱保

昭祖族人昭祖耀武於青嶺白山還至姑里甸昭祖
 得疾寢於村舍洞無門扉乃以車輪當門為蔽擱保
 臥輪下為捍禦已而賊至刃交於輪輻間擱保洞腹
 見膏恐昭祖知之乃燃薪取膏以為炙昭祖既覺遂
 中夜啓行

幹賽

宗室子康宗二年幹帶治蘇濱水部不聽命者幹賽
幹魯佐之定諸部而還久之高麗殺行人阿聒勝昆
而築九城於曷懶甸幹賽將內外兵守之高麗兵數
萬來拒幹賽分兵爲十隊更出迭入遂大破之幹賽
母病召還以幹魯代之未幾幹賽復至再破高麗軍
進圍其城高麗請歸前後亡命及所侵故地退九城
之戍遂與之和皇統五年追封衛王

撒改

世祖之姪敦厚多智長於用人居純儉好稼穡穆
宗初襲位命撒改爲國

國相如故撒改

自爲國相能馴服諸部訟獄皆得其情伐遼之計決
於廸古廼贊成大業實自撒改始之天會十五年追
封燕國王大定三年配饗太祖廟庭謚忠毅
斜卯阿里

穆宗時從石適歡與高麗戰一日之間三破重敵遼
人數萬攻孛堇忽沙里城阿里率百餘人救之令軍
士裂衣多爲旗幟出山谷間遼兵望見遯去阿里自
結髮從軍大小數十戰每戰皆捷尤習舟楫江淮用
兵無役不從人以水星目之爲迭里部節度使加特
進封王謚智敏阿里性忠直多智略兄弟相友愛家故

饒財以已猛安及財物盡與弟愛拔里愛拔里不肯受逃避歲餘阿里終與之

宗杲

一名斜也世祖第五子收國元年爲吳勃極烈天輔元年以兵下金山縣克泰州城五年爲忽都勃極烈都統內外諸軍取中京實北京也六年克之太祖定燕京還次鴛鴦灤杲從還京師太宗卽位杲爲諸班勃極烈治國政天會三年伐宋杲領都元帥卒封遼越國王配享太祖廟庭

婁室

字幹里衍完顏部人太祖克寧江州婁室進兵咸州克之太祖趨達魯古城遼耶律訛里朶以二十餘萬衆來拒婁室與銀朮可縱兵衝其中堅凡九陷陣皆力戰而出及取黃龍府命婁室爲萬戶守之夏人救遼至天德濟水爲陣婁室使人報幹魯隨分軍爲二迭出迭入進退轉戰三十里過宜水幹魯軍亦至合擊敗之後破朔州復襲遼主於余谷獲之賜鐵券取西京又屢敗宋師天會八年卒贈金源郡王配享太宗廟庭謚莊毅

闍母

太祖異母弟高永昌據東京闍母破之於首山太祖
 攻遼上京闍母先登克其外城遂降之都統杲兵至
 中京闍母自城西沿土河以進遂克其城宗翰等攻
 西京為四輪革車高出城上闍母與麾下乘車先登
 遂取西京又克南京殺偽都統張敦固伐宋為都統
 節制諸軍屢有摧敗天會六年卒追封吳王配享太
 祖廟庭謚莊襄
 銀术可

宗室子首贊太祖伐遼及遼戰於達魯古城銀术可
 與婁室率眾擣其中堅後又屢敗宋師天會十年為

燕京留守遷中書令封蜀王卒贈金源郡王配享太

宗廟庭謚武襄

漫都本

景祖孫孝友恭謹多謀善戰年十五隸軍中攻寧江
 州取黃龍府破高永昌取春泰州皆有功遂為謀克
 奚契丹寇土河西漫都本摧鋒力戰破其眾九萬後
 與闍母攻興中府中流矢卒天眷中謚英毅

宗賢

本名阿魯太祖伐遼從攻寧江州臨潢府有功遷歸
 德軍節度使政尚寬簡境內大治秩滿士民詣闕請

留及改武定軍百姓扶老携幼泣送數十里改永定
 軍秉德廉訪官吏士民持盆水與鏡前拜言曰使君
 廉明清直類此秉德賢之因超遷兩階天德初授世
 襲謀克雄州父老相率張青繩懸明鏡於公署擁門
 三日乃得去封定國公進廣寧郡王改崇義軍節度
 使大定初宗賢率諸宗室見世宗於遼陽封景國公
 致仕起為婆速路兵馬都總管復致仕卒

按遼史有兩宗賢此

始祖以下諸子其名
 賽里者太祖諸子也

宗雄

康宗長子九歲能射逸兔年十一射中奔鹿既長孝

敬謙謹人愛敬之嘗逐兔撻懶亦從後射之已發矢
 撻懶大呼曰矢及矣宗雄反顧手接其矢就射兔中
 之從太祖破遼兵於出河店及獲冰谷固功最鉅既
 取泰州宗雄包其土來奏曰其土如此可種植也由
 是徙萬餘家屯田泰州從大軍克西京遇疾卒太祖
 勳曰此子謀略過人臨陣勇決少見其比於是賻葬
 加等大定二年追封楚王謚威敏配享太祖廟庭圖
 像衍慶宮

宗翰

本名粘沒喝建議破遼經略夏國有功伐宋入汴賜

鐵券及入朝與宗幹希尹建議立熙宗熙宗卽位拜
太保尙書令封晉國王大定間改贈秦王謚桓忠配
享太祖廟庭

宗望

本名幹魯補又作幹離不太祖第二子每征伐常在
左右破遼入汴皆有功追贈太師封宋王謚桓肅配
享太宗廟庭

宗弼

本名幹斨又作兀朮太祖第四子伐宋有功卒定畫
淮之約賜金券皇統三年爲太師領三省事都元帥

領行臺尙書省事大定中謚忠烈配享太宗廟庭

完顏希尹

本名谷神從太祖征伐屢有功金人初無文字太祖
命希尹撰本國字希尹因契丹字制度依倣漢人楷
字合本國語制金國字天輔三年字書成太祖大悅
命頒行之後熙宗亦制金國字與希尹所制俱行希
尹所撰謂金國大字熙宗所撰謂小字宗翰襲遼主
於五院司希尹爲前驅所將纔八騎與遼兵戰一日
三敗之遼主遁去西京遂降及大舉伐宋以功賜鐵
券熙宗等爲相封陳國王以讒死後知其無罪贈那

金史通志 卷之三十三
國公天德三年追封豫王大定中謚貞憲
阿離合懣

景祖第八子健捷善戰太祖舉兵阿離合懣在行間
屢有功爲人聰敏辨給凡祖宗族屬時事並能默記
見人舊未嘗識聞其祖父名卽能道其部族世次積
年舊事人或遺忘輒一一辨析言之天輔三年寢疾
宗翰日往問之盡得祖宗舊俗法度太宗幸其家視
疾詢以國事對曰馬者甲兵之用今四方未平而國
俗多以馬殉葬請行禁止從之太祖卽位與宗翰以
耕具九爲獻祝曰使陛下毋忘稼穡之艱難頃之爲

國論乙室勃極烈熙宗時追封隋國王大定間配享
太祖廟庭謚剛憲

耶律恕

字忠厚遼橫帳秦王之族也謹愿有志喜讀書長於
謀略撒离喝辟署陝西參政委以軍務遷尙書左司
郎中海陵爲平章政事謂恕曰君亦有黨乎恕正色
曰窮則獨善其身達則兼善天下不以其道得之非
恕之志也何黨之有及爲參知政事以疾求解爲興
中尹封廣平郡王

完顏勗

字勉道穆宗第五子宗翰宗望定汴州太宗使勗勞
軍贈賄皆不受惟載書數車而還勗好學能文所撰
本國郡望姓氏譜及他文甚衆累功封金源郡王
夾谷吾里補

暗土渾河人多智謀膂力過人初隸婁室帳下救幹
魯古於威州敗遼兵於押魯虎城皆有功及拔廣寧
攻臨潢取中京累破遼軍睿宗伐宋富平之役吾里
補先登賞以金器名馬累官孛特木部族節度使致
仕封芮國公吾里補雖老勇健不少哀大定初劇賊
嘯聚山特鄙關率鄉里年少逆擊之賊黨遂潰大定

二十六年卒年一百有五歲

阿勒根沒都魯

上京納鄰河人後徙咸平路梅黑河雄偉美鬚髯勇
毅善射金初伐遼沒都魯領謀克猛安每遇敵往來
馳突人莫敢當故所戰皆克累功授世襲木路寧打
渾河謀克爲肇州防禦使蒲與路節度使以年老致
仕卒

烏延蒲魯

曷懶路人膂力超絕能挽強射二百七十步與兄鶻
沙虎俱以勇健隸闍母帳下攻黃龍府力戰有功從

宗弼自淮西渡江取江寧循海道隳明州而歸天眷
二年授鎮國上將軍皇統六年授世襲謀克延安尹
致仕大定二年至中都上謁除東京留守時年七十
三世宗召見謂之曰卿宿將久練兵事年雖老精神
不衰因命到官旬月一視事封爾國公

烏延蒲里黑

速頻路哲特猛安人從太祖伐遼勇聞軍中徒單合
喜定秦隴蒲里黑統兵救德順州以功封任國公

訛古乃

系出景祖姿質魁偉年十四隸秦王宗翰軍中北部
援遼方臨陣中有躍馬而出者訛古乃直前生擒之
問其名曰同瓜北部中之最勇者也訛古乃善馳驛
日能千里天會八年從秦王在燕聞余睹反於西北
令訛古乃馳驛以往黎明走天德及至日未曛也皇
統元年以功授寧遠大將軍豪刺唐古部節度使

烏古論三合

曷懶路人睿宗爲右副元帥聞三合勇略選充扎也
以積勞屢典名郡歷臨潢尹所至躬行儉約政先寬
簡邊庭寧謐人民獲安召爲簽書樞密事卒

盧克忠

貴德州鳳集人高永昌據遼陽克忠歸金源郡王幹魯幹魯克東京永昌走長松島克忠與渤海人撻不也追獲之收國二年授世襲謀克其後定燕伐宋皆與有功除登州刺史天德間同知保大軍節度使綏德州軍卒數人道過鄜城求宿民家是夜其家被盜有司執夜宿卒榜掠誣服克忠察其寃獨不肯署未幾果得賊大定二年除北京副留守會民艱食克忠下令凡民有蓄積者計留一歲悉平其價糴之由是無捐瘠之患

大臭

本名撻不野其先遼陽人收國二年為東京奚民謀兒兼同知東京留守事取中西兩京隸闔母軍遼軍二十萬來戰吳王使臭守營臭堅請戰或謂臭曰戰厄事獨苦請何也臭曰丈夫不得一決勝負尚何為苟臨戰不捷雖死猶生也吳王聞而壯之乃遣出戰遂有功天會四年從擊宋兵克河間闔母怒其不降縱軍大掠臭諫止之已掠者官為贖還除河間尹累功拜右丞相天德四年請老為東京留守貞元三年拜太傅領三省事累封漢國王卒諡傑忠

田灝

字默之興中人遼天慶八年進士太祖定燕以灝權
節度使四遷知真定招降賊衆五千餘人賊壘悉平
遷行臺左丞彰德軍節度使是時新定力役灝蠲籍
之半而上之故相之徭賦比他州獨輕徙同知河北
東路都總管改同簽燕京留守司事民遮留不得出
易服夜去累遷刑部尚書請老卒

王伯龍

瀋州雙城人天輔二年率衆歸太祖授世襲猛安太
祖攻臨潢伯龍護糧餉遇遼兵五千餘邀於路伯率
輓夫擊散之四年從攻下中京并克境內諸山寨爲

靜江軍節度睿宗經略山東下青州伯龍功第一功
濮州濮城中鎔鐵灼攻者伯龍被重甲首冠大金挺
槍先登遂克之進攻徐泗廬和等州伯龍功尤最加
太子少保累官寧昌軍節度使封廣平郡王

王政

辰州熊岳人遼季高永昌據遼東知政材略欲用之
不就永昌敗渤海人爭縛以爲功政獨逡巡引退吳
王闍母聞而異之言於太祖授廬州渤海軍謀克從
破白霽下燕都皆有功金兵降宋滑州留政爲安撫
使先是河北降州屢殺守將人爲政憂之政曰苟利

國家雖死何避遂從數騎入州釋繫囚發倉廩民大悅不復叛尋除同知金勝軍節度使兼掌軍資是時軍旅始定筦庫未立掌吏皆因緣爲姦政獨明會計嚴扁鑰金帛山積而出納無錙銖之失吳王闍母戲之曰官久而不加富何也對曰政以楊震四知自守安得富吳王笑曰前言戲之耳以黃金乘馬遺之天眷元年仕至保靜軍節度使致仕卒

毛子廉

臨潢長泰人材勇善射遼時應募捕盜以功授東頭供奉官天輔四年率戶二千六百歸令就領其衆在

臨潢十餘年吏民畏愛如一日除寧昌軍節度使海

陵弒熙宗子廉聞之嘆曰不念國王定策之功耶遂

致仕

高彪

辰州渤海人始生其父六哥用術者言爲其時日不利於已欲不舉及彪數歲竟逐之匿於外家遼人調兵東京時六哥已老當從軍悵然謂所親曰吾兒若在可勝兵矣彪聞之因見父代其行戰於出河店遼兵敗走彪獨力戰東京旣降彪遂從幹魯屢戰有功天會五年授靜江軍節度使從帥府狗地山東彪勇

健絕人能日行三百里身被重鎧行險如飛及臨敵身先士卒未嘗反顧大小數十戰率以少擊衆無不勝捷歷官樞密副使舒國公卒謚桓壯
奔睹

景祖弟孛黑之孫也一名昂年十七從太祖平燕有功天會二年南京叛軍帥闍母遣奔睹討平之天眷元年宋兵十萬攻東平奔睹多張旗幟於林間自將精兵於陣前敵疑有伏不敢動相持數日而退奔睹襲之至清口宋兵汎舟逆水而去時霖雨不止奔睹附水屯營夜將半忽促衆北行下令曰鼓聲絕而後

者斬遂棄營去二十里是夜宋人劫營無所得諸將問故奔睹曰汭流下者定也沂流上者誘我必追也今大雨泥淖彼舟行安我陸行勞士卒饑乏弓矢敗弱又居下流襲我必矣衆皆稱善在東平七年遷東北路招討使改崇義軍節度使遷會寧牧天德初授上京路世襲猛安封瀋國公大定中進封漢國公奔睹在海陵時縱飲沉酣及世宗卽位頗自愛性素敦睦尤善施子貧困者必厚給之卽使人富定或以子孫計爲言答曰人各有命但使其能自立耳何至爲子孫奴耶君子以爲達

獨吉義

曷速館人徙居遼陽之阿米吉山收國二年父秘刺領三百戶來附遂爲謀克秘刺長子照屋次子忽史與義同母秘刺死忽史欲承謀克義曰長兄雖異母不可奪也忽史乃以謀克歸照屋人咸義之天會十五年除寧化州刺史察廉遷送刺部族節度使世宗卽位義卽日來歸拜參知政事義鎮靜有識度善談論服玩不尚奢侈食無兼味大定二年以疾致仕卒於家

高楨

遼陽渤海人少好學嘗業進士幹魯討高永昌已下瀋州楨以母在瀋遂降幹魯以楨同知東京留守事天會六年以尙書左僕射判廣寧尹在鎮八年政令肅清吏畏民懷天眷初同簽會寧收遷太子太保行御史大夫封代王楨久在臺省彈劾無所避每進對必以進善退惡爲言卒年六十九楨性方嚴居家無聲伎之奉雖甚暑未嘗解衣緩帶對妻孥危坐終日不輕談笑其簡默如此

張浩

字浩然渤海人好賢樂善博通經史尤長於詩初以

策謁太祖卽命承應御前文字天會八年賜進士及第天眷二年詳定內外儀式歷戶工禮三部侍郎遷禮部尙書田穀黨事起臺省一空以浩行六部事簿書叢委決遣無留人服其才以疾求外補歷平陽尹平陽多盜臨汾男子夜掠人婦浩捕得榜殺之盜遂衰息撤淫祠黜墨吏郡中大治大定初拜太師尙書令封南陽郡王所薦紇石烈志寧等後皆爲名臣初近侍有欲罷科舉者世宗問浩曰自古帝王有不用文字者乎對曰秦始皇世宗顧左右曰豈可使朕爲始皇乎事遂寢七年十月勅有司於東宮涼樓前增設殿位浩諫曰皇太子雖爲儲貳宜示以儉德不當與至尊宮室侔乃罷之平生所著有華表山人集卒謚文康配享世宗廟庭五子皆貴顯

李石

字子堅遼陽人貞懿皇后弟也父繼訛只桂州觀察使高永昌據東京率衆攻永昌不勝死之石敦厚寡言而器識過人天會二年授世襲謀克大定元年以定策功爲參知政事石少貧貞懿后周之不受曰國家方急用人正宜自勉何患乎貧有慢之者初不校及爲相其人以事見石惶恐石曰吾豈念舊惡者待

之彌厚山東河南軍民交惡爭田不絕有司謂兵爲國本姑宜假借石曰兵民一也惟當明其疆里示以法禁使之無爭趣有司推問軍民之爭遂息北鄙歲警朝廷欲發民穿塹以禦之石與丞相紘石烈良弼皆以爲無益勞民議遂寢大定中致仕進封廣平郡王子獻可大定十年進士世宗喜曰太后家有子孫舉進士甚盛事也累官戶部侍郎封道國公

李三錫

字懷邦錦州安昌人遼季盜攻錦州州人衆推三錫主兵事設機應變滅賴以完入金攝臨海軍節度副使改知嚴州遷武勝軍節度使察廉第一除河北西路轉運使致仕三錫政事強明所至稱治世宗舊聞其名大定初起爲北京路都轉運使制下而三錫已卒

阿魯補

系出景祖魁岍多智略勇於戰鬪未冠從軍下咸州東京伐宋平河南功皆最進元帥右監軍婆速路統軍歸德軍節度使歷官有惠政得民心後爲海陵所殺人皆惜之大定三年贈儀同三司

突合速

宗室子嘗領偏師破雲中諸山寇又討應州賊平之
撫安其民而還及伐宋戰屢有功亭董烏谷攻石州
屢敗突合速謂烏谷曰敵皆步兵吾不可以馬烏谷
曰聞賊挾妖術畫馬以繫其足疾甚奔馬步戰豈可
及之突合速笑曰豈有是耶乃令諸軍去馬戰敵遂
大敗天眷三年爲元帥左都監卒正隆二年贈應國
公

移刺成

其先遼橫帳人沉勇有謀天會間隸撻懶爲行軍猛
安戰於楚泗之間以所部先登功最諸將從宗弼將

兵廢齊國及再伐宋攻濠州每戰輒先登多所摧破
宗弼再取河南城以功除威州刺史用廉擢知延安
尹大定二年以廉在優等改河中尹遷北京留守封

任國公

夾谷謝奴

隆州納魯悔河人也長身多髯善騎射通女直契丹
大小字及漢字從攻和尚原出仙人關計前後功襲
其父猛安謀克累遷工部尚書改平涼尹昭義軍節
度卒

阿勒根彥忠

曷速館人性孝友好學通吏事天會七年爲會寧少尹進同知會寧府事入爲吏禮部侍郎海陵凡有所疑常使裁決彥忠據法以對間有不合則召讓之彥忠終無阿屈大定四年進刑部尚書詔規措北邊艱食戶口及泰州臨潢接境度宜安置堡戍七駐兵萬三千芻糧之用就經畫之還朝未及入對卒贈榮祿大夫命有司致祭

顏蓋門都

隆州帕里干山人長身美髯天眷初叛將定國軍節度李世輔邀宗室杲至私署以獻甲爲名遂以兵劫杲去門都突出以告完顏撻懶同率兵追及首出與戰杲由是得脫齊國初廢諸路反覆不一授門都牌劄令往撫定門都多張甲兵從者安之違者討之帖然無復叛者大定初從平秦隴以功授慶陽尹兼本路兵馬都總管卒於官門都性忠厚謹愨安置營壁尤能慎密有敵忽來雖矢石至前號令士卒如平時由是人益安附而功易成焉

移刺斡里朶

系出遼五院司天會三年伐宋隸軍中遇戰輒先登以功補尚書省令史皇統二年同知昭德軍節度使

以廉陞孟州防禦使正隆間轉同知北京留守會遊古河闌子山等猛安契丹謀亂方發兵討之別遣幹里朶押軍南下至松山縣爲賊黨江哥所執且欲推爲盟主要以契約幹里朶怒曰我豈從汝反寧殺我契約不可得也賊知不可屈乃困辱之以計脫還改北京路轉運使再遷利涉軍節度使先是有農人避賊入保郡城以錢寄鄰家賊平諱不與訴於縣以無契驗却之乃訴於州幹里朶陽怒械繫之捕其鄰人關以三木詰之曰汝鄰已坐劫殺人指汝同盜鄰人懼自陳有欺錢之隙乃責歸所隱錢而釋之郡人駭服

梁肅

字孟容廣寧奉聖州人幼勤學天眷二年擢進士第調平遙主簿遷絳縣令以廉介聞遷彰德節度營治汴宮肅分護役事攝大名少尹正隆末境內盜起百姓陷賊中不能自辯者數千人皆繫大明獄肅至官得其情讞出者十八九大定四年通檢東平大名兩路戶籍物力稱其平允他使者所至皆以苛刻增益爲功百姓訴苦之朝廷勅諸路以東平大名通檢爲準於是始定七年河決李固詔肅視之遂奏決河水

六分舊河水四分今塞決河復故道爲一再決而南則南京憂再決而北則山東河北皆可憂不若止於李固南築隄使兩河分流以殺水勢世宗從之十四年充宋國詳問使稱旨遷濟南尹召拜參知政事知無不言致仕卒謚正憲

按金史梁肅係廣寧奉聖州人不在今錦州境內

張元素

字子慎與浩同曾祖高永昌據遼陽元素出歸幹魯世襲銅州猛安天眷元年知涿州察廉最進一階歷遷東京路都轉運使改興平軍節度使正隆末年天下盜起元素發民夫增築城郭同僚止之不聽未幾寇掠鄰郡皆無備而興平獨安世宗卽位元素來見於東京與李石力言早幸燕都世宗深然之遷戶部尙書出鎮武定遂致仕年八十四卒元素厚重剛毅人畏憚之往往以片紙署字其上治瘡輒驗人皆異之

張九思

字全行錦州人皇統初補行臺省國書譯史遷亳州防禦使副劉仲延受宋國歲貢於泗州往歲受貢每以幣物不精責使者私饋不貲至九思獨不肯受仲延從之私饋遂絕累遷工部尙書清約終身

耶律安禮

系出遙輦氏幼孤事母以孝聞遼季間闕避難未嘗一日怠温清天眷初從元帥於山西母喪不克歸葬主帥憐之賻禮甚厚安禮冒大暑挽柩行千餘里哀毀骨立行路嗟嘆天德間歷工部尚書被詔鞠韓王亨獄於廣寧無反狀安禮還奏海陵怒再遣李老僧同鞠之老僧遂殺亨於獄海陵將伐宋安禮密諫復忤海陵意罷爲南京留守安禮長於吏事廉謹自將嘗從帥府再伐宋寶貨入口一無所取貴爲執政奴婢止數人皆有契券時議賢之卒年五十六

宗憲

本名阿懶年十六選入學兼通契丹漢字未冠從兄翰伐宋汴京破人爭趨府庫取財物宗憲獨載圖書以歸朝廷議制度禮樂多仍遼舊宗憲以爲當遠引前古因時制宜成一代之法何乃取遼人制度哉希尹由是器重之累官尚書左丞攝門下侍郎皇統五年將肆赦議覃恩止及女直人宗憲奏曰莫非王臣慶幸可有間耶遂改其文使均被焉天德初爲中京留守進封鉅鹿郡王世宗卽位召爲太子太師拜平章政事時有司言諸路猛安謀克怙其世襲多擾民

請同流官以三十月爲考憲乃上議曰昔太祖撫定天下誓封功臣襲猛安謀克今若改爲遷調非太祖約臣謂但當明核善惡有不職者於弟姪中更擇賢者代之上從其議進拜右丞相大定六年卒

大懷貞

字子正遼陽人皇統五年除閤門祇候累官彰國安武軍節度使縣尉獲盜得一旗上圖亢宿詰之有叛狀株連幾萬人懷貞請誅首亂者餘俱釋之改興中尹錦州富民蕭鶴壽途中殺人匿府少尹家有司不能捕懷貞取之寘於法改彰德軍節度使

僕散忠義

本名烏者上京拔盧古河人魁岸長髯喜談兵年十六領本謀克兵從宗輔定陝西皇統四年除博州防禦以職業爲務郡中翕然稱治公餘學女直字及古算法閱月餘盡通之一夕陰晦囚徒謀反獄將吏皆惶駭失措忠義但使守吏搥鼓鳴角囚徒以爲天且曉不敢出自就桎梏及考滿郡民詣闕請留詔從之八年入爲兵部尙書梅陵篡立出爲震武軍節度使世宗卽位入朝拜爲尙書右丞契丹移刺寫幹僭號拜忠義平章政事兼右副元帥討平之封沂國公大

定二年紇石烈志寧經略宋事詔忠義以示相總戎
事居南京節制諸將五年和議定忠義朝京師世宗
勞之曰宋國請和偃兵息民皆卿之力也拜左丞相
兼都元帥明年卒謚武莊忠義動遵禮法謙以接下
善御將士得其死力及爲宰輔知無不言以功名終
世罕其匹泰和元年圖像行慶宮配享世宗廟

蒲查

上京梅堅河人初爲元帥府札也使於四方稱職按
事能得其實皇統間除開遠軍節度使斥埃嚴整邊
境無事歷婆速路兵馬都總管西北路招討使蒲查
性廉潔忠直臨事能斷凡被任使無不稱云

徒單合喜

上京速蘇海水人貌魁偉多膂力一經見聞終身不
忘皇統二年爲隴州防禦使遇敵每以少擊衆遷延
安尹時關陝以西百姓罹兵革多失業合喜守之以
靜民多安集大定二年爲陝西路統軍使轉右都監
宋人陷臨洮鞏秦等州府一十六合喜盡復之九年
入爲平章政事封定國公泰和元年配享世宗廟庭
宗賢

本名賽里昭祖之曾孫始自護衛未十年位兼將相

常感激思自効以報朝廷雖與悼后爲母黨未嘗附之以希進用與海陵同在相位未嘗肯假借海陵知悼后怨賽里因與后共排出之及海陵弑熙宗詭以熙宗將議立后召之及被執猶以爲熙宗將立常勝妻而先殺之也曰我死固不足惜獨念主上左右無助爾遂遇害

楊伯雄

字希雲其先真定藁城人八世祖彥稠清泰中爲定州兵馬使隨晉王北還居臨潢遂爲臨潢人伯雄登皇統二年進士調韓州軍事判官有二盜詐稱賈販

逆旅主人見欺至州署陳訴實欲劫取伯雄伯雄覺其詐執詰之並獲其黨一郡駭服遷應奉翰林文字時海陵執政自以舊知伯雄屬頻至其第伯雄諾之而不一往他日海陵怪問之對曰君子受知於人當以禮進附麗奔走非素志也及海陵立遷右補闕海陵召與語每至夜分嘗問以鬼神事對以未學必使言之乃曰臣家有一卷書記人死復生或問冥官何以免罪答曰汝置一歷白晝所爲暮夜書之不可書者是不可爲也海陵爲之改容大定初爲太子詹事集古太子賢不肖爲書號瑤山往鑒進之及進羽獵

保成等箴皆見嘉納伯雄知無不言匡救實多後宮僚有詭隨者必稱楊詹事以愧之除定武軍節度使改平陽尹先是張浩尹平陽有惠政至是百姓並稱之曰前有張後有楊卒諡莊獻

楊伯仁

字安道伯雄之弟也天性孝友讀書一過成誦文辭典麗時輩莫及登皇統九年進士養親不求調天德二年除應奉翰林文字轉修撰孟宗獻發解第一伯仁讀其程文稱之曰此人當成大名是歲宗獻府試省試廷試皆第一號孟四元時論以爲知文世宗時

兼左拾遺上書論時事改大名少尹郡中豪民恣橫伯仁窮竟渠黨四境帖然讞館陶大辟得其寃狀館陶人爲立祠入爲諫議大夫兼太常卿

鄭子聃

字景純大定府人父宏遼金源令子聃及冠有能賦聲天德三年廷試一甲第三子聃自負嘗慊不得爲第一人正隆二年海陵以第一人程文問子聃子聃少之海陵不悅乃使子聃與翰林修撰楊伯仁宣徽判官張汝霖等同進七雜試子聃果第一海陵奇之擢修撰京畿早詔子聃決囚遂澍雨人以此顏真卿

累遷侍講兼修國史子聃英俊有直氣爲文亦然平生所著詩文二千餘篇

溫敦蒲刺

始居長白山阿不幸河徙隆州移里閔河蒲刺初從希尹征伐遇賊突出力擊敗之天德初遷宿直將軍與衆護衛射遠皆莫能及正隆伐宋遇宋兵二萬餘於汝州南邀擊敗之招集嵩汝兩州百姓使復其業累遷至鎮西胡里改顯德軍節度使致仕卒

移刺道

其先乙室部人初徙咸平爲人寬厚有志節以篤學著名海陵伐宋爲都督府長史海陵死師還掠淮南百姓苦之有男女二百餘人自願與道爲奴道攜至淮俟諸軍畢濟乃悉遣還僕散忠義討窩斡道參謀幕府所分俘獲生口悉縱遣之歷遷戶部尚書西北路招討使諸路依故事皆獻馳馬多至數百道並却之數月皆復貢職二十三年罷爲咸平尹封莘國公世宗曰卿數年嘗乞致仕朕未許卿今老矣咸平卿故鄉地涼事少老者所宜又傳諭曰咸平自窩斡亂後民業未復聽卿歸里所以安輯一境也明年卒完顏兀不喝

會寧府海姑寨人選流女直字學生補上京女直吏
天德初除吏部主事問押懶路詐襲謀克事人稱其
能大定中同知大興尹遷橫海軍節度使初到官讞
囚能得其情人以爲不寃

烏延蒲轄奴

曷懶路星顯河人身長有力多智略襲父猛安謀克
貞元元年授昌武軍節度使以善撫綏再任海陵南
征爲神策都總管破濟州號令士卒毋害居民民感
其惠爲立祠以祭

烏延胡里改

曷懶路星顯河人從闍母攻平州及伐宋圍浦屢有
功七年討泰山羣盜平之兗州羣盜三千餘保據山
險胡里改復破之貞元三年同知曷懶路總管大定
四年授胡里改節度使

蒲察鼎壽

上京遏速河人欽懷皇后父也賦性沉厚有明鑒長
於吏事歷蠡州刺史濬州防禦使有惠政百姓刻石
紀之改河間尹號令必行豪右屏跡郡內大治卒於
官鼎壽世聯姻戚女爲皇后男尙公主未嘗以富貴
驕人時以爲外戚之冠

蒲察世傑

曷速館幹篤河人徙遼陽多力善射能以拳擊牛折
脅而死有糧車陷淖中七牛不能出世傑手挽出之
宗敏爲東京留守召置左右海陵時爲護衛知世傑
勇力絕倫陰使有所誅鋤許以非常之賞世傑曰臣
自誓不以非道害物雖死不敢奉詔海陵愛其勇亦
不之罪正隆四年調諸路兵伐宋世傑往曷懶路籍
數獨少海陵詰之對曰曷懶地接高麗今若多籍其
丁卽自緩急何以爲備海陵喜曰他人用心不汝及
也世傑從伐宋擐甲佩刀腰箭百隻持槍躍馬往來
軍中敵人以爲神將從僕散忠義討平契丹與徒單
合喜經略隴右皆有功累遷亳州防禦使卒世傑少
貧疎財尙氣每敗敵衆必戒殺掠平居非忠孝不言
親賢樂善甚獲當世之譽

烏延查刺

蒲轄奴子也力兼數人勇果無敵正隆六年伐宋諸
猛安謀克兵皆行州縣無備契丹括里陷韓州圍信
州遠近震駭查刺道出咸平遂率本部亟還信州與
戰敗之已而賊復整兵環攻且登其城查刺下巨木
壓之殺賊甚衆乃解去查刺左右持鐵簡簡重數十

斤號鐵簡萬戶追及括里於韓州東八里許以鐵簡揮擊無不僵仆賊不能成列乃易馬督軍復擊之賊大敗遂走東京咸平隆州民復帖然世宗卽位查刺率兵數敗窩斡斡募人刺之僞護衛阿不沙身長有力奮大刀自後斫查刺查刺以簡背擊阿不沙折其右臂與紇石烈志寧軍合擊賊大敗之窩斡平以爲宿直將軍遷興中尹改婆速路總管高麗憚其威名二十五年爲興平節度卒查刺貞懿寡言平居極和易及臨戰奮勇見者辟易出入萬衆中若無人之

境云

鄧儼

字子威懿州宜民人天德三年進士大定中宰臣奏儼明事機有心力擢戶部侍郎翌日世宗復謂宰臣曰吏部掌銓選當得通練人可寘儼於吏部明昌初爲戶部尚書上命尚書省集百官議如何使民棄末務本以廣儲蓄儼言今之風俗競爲侈靡莫若定制度使貴賤上下衣冠車馬室宇器用各有等差裁抑婚姻喪葬過度之禮罷去鄉社道逐無名之費用度有節則蓄積日廣矣後出知歸德府致仕

高德基

字元履遼陽渤海人皇統二年進士爲尙書省令史
大定九年遷刑部尙書有犯應死宰相欲從末減德
基曰失出猶失入也不從及奏世宗曰刑部議是因
召諭之曰自朕卽位以來與宰相爭是非者德基一
人而已十一年改戶部尙書德基上疏乞免軍需房
稅農稅鹽酒等課不報

僕散渾坦

蒲與路挾懣人身長七尺勇健善騎射遷利涉軍節
度使改咸平尹世宗卽位以爲廣寧尹與徒單克寧
敗窩斡於長灤改臨潢尹賊平改曷懶路兵馬都總
管終利涉軍節度使

僕散揆

武莊公忠義之子體剛內和與物無忤知臨洮府以
政績聞陞陝西提刑司舉揆剛直明斷獄無冤滯禁
戢家人百姓莫識其面及同知崇義軍節度使有戰
功經營北邊築壘穿塹營柵相望田牧無警邊境遂
寧

永成

世宗子風姿奇偉博學善屬文世宗尤愛重之大定
七年始封潘王承安改元進封豫永成喜讀書晚年

所進益醇暇日與文士相切磋未嘗見驕色自號樂善居士明昌三年永成誕日上賜以詩有美譽自應輝玉牒忠誠不待啓金滕之句當世榮之

神土懣

宗室胡速魯改子也累官肇州防禦使大定初與咸平尹吾扎忽會臨潢尹移室懣討契丹契丹犯臨潢移室懣死攻之神土懣與阿思懣乘城固守賊不能克改曷速館節度使與紇石烈志寧敗賊於長樂戰霧霖河皆有功遷婆速路兵馬都總管卒

宗寧

系出景祖性勤厚有志操大定一二年爲會寧府路押軍萬戶擢歸德軍節度使時方旱蝗宗寧督民捕治得死蝗一斗給粟如之數日蝗絕移鎮臨潢累遷兵部尙書授隆州路和團猛安徙鎮利涉軍入授同判大睦親府事拜平章政事宗寧居家儉約如寒素臨事明敏其鎮臨潢鄰國有警宗寧聞知乏糧卽出倉粟令以牛易之敵知得粟卽遁去邊人以窩斡亂後苦無牛宗寧復令民以粟易牛而倉粟倍於舊其經畫如此云

宗尹

宗室子大定中拜平章政事封代國公世宗患民間
錢幣不通以問宗尹對曰錢者有限之物積於上者
滯於下所以不通昔海陵軍興爲一切之賦有菜園
房稅養馬等錢百姓苦之今天下無事府庫充積悉
宜罷去世宗納之於是養馬等錢始罷北方歲饑軍
食不足議者謂秋成在近不必更勞輸輓宗尹曰國
家平時積粟所以備凶歲也必待秋成則億者衆矣
如防戍何世宗從之

溫廸罕蒲里特

隆州人魁梧美髯有謀略以智勇聞賊識其旗幟

風奔潰大定三年授泰寧軍節度使卒

孛術魯阿魯罕

隆州琵琶葛山人僕散忠義討窩斡辟置幕府甚見
信任窩斡旣平阿魯罕招集散亡復業者數萬人紇
石烈良弼薦阿魯罕有才幹持心忠正言不阿順遷
勸農副使兼侍御史右司郎中改西南路招討使有
司督木路猛安人戶所貸官粟阿魯罕乞俟豐年從
之改陝西路統軍使阿魯罕所至稱治陝西政績尤
著召爲參知政事乞致仕除北京留守

尼龐古鑑

隆州人大定十三年進士調隆安教授擢近侍局直長改太子侍丞遷應奉翰林文字世宗嘗謂宰臣曰鑑嘗近侍朕知其正直幹治及爲東宮侍丞保護太孫禮節言動猶有國俗純厚舊風朕甚嘉之明昌五年拜參知政事卒諡文肅

徒單鑑

上京路猛安人幼穎悟絕倫大定九年詔策女直進士問以求賢爲治之道鑑等二十七人及第除中都路教授遷國子監助教累遷翰林待制兼右司員外郎獻光武中興賦世宗大悅曰不設此科安得此人

章宗卽位拜參知政事進平章政事封濟國公所奏多切時弊一日章宗問漢高帝光武優劣鑑曰光武再造漢業在位三十年無沉湎冒色之事高祖惑戚姬卒至於亂由是言之光武優章宗默然鑑蓋以元妃李氏隆寵過甚故微諫也大安初封濮國公充遼東安撫副使二年改上京留守會河堡之敗中都戒嚴鑑急選兵二萬入衛朝廷嘉之徵拜尙書右丞相及胡沙虎難作鑑傷足在告胡沙虎詣鑑問疾鑑勸之迎立宣宗至寧貞祐之際轉敗爲功惟鑑是賴焉宣宗卽位進拜左丞相卒鑑明敏方正學問該貫嘗

言文章雖巧拙不同要以仁義道德爲本所著有弘
道集六卷

高德齋

遼陽鶴野人才高學博弱冠登進士第官至西京轉
運使

夾谷衡

本名阿里不山大定十三年初設女直進士衡舉第
四人補東平府教授世宗嘗謂宰臣曰女直進士若
徒單鎰夾谷衡尼厖古鑑皆有用材也明昌二年拜
參知政事四年詔諭之曰卿忠實公方審其是則執
而不回見其非則去而能果度其事勢有若權衡可
賜名衡胥持國言區種法衡曰若苟有利古已行之
且用功多而所種少恐復荒廢土田無益勞民也承
安二年出爲上京留守規畫北邊修完封界四年就
拜平章政事封英國公

紇石烈志寧

上京胡塔安人海陵時契丹撒八反志寧爲西北面
副統與都統白彥敬討之方至北京而海陵伐宋已
渡淮聞世宗有異志乃陰結會寧尹完顏蒲速賚利
涉軍節度使獨吉義將攻之而世宗已卽位遣使來

招彥敬志寧殺其使者九人力屈乃降世宗以爲忠於所事授志寧臨海軍節度使擊窩斡有功遂以志寧代右副元帥完顏謀衍窩斡既擒餘黨皆平入朝爲右副元帥宋人陷宿州志寧力戰走其將李世輔遂復取之並取盱眙濠廬和滁等州和議亦由是成十一年代宗敘北征還遣使迎勞賜弓矢及玉吐鶻封廣平郡王明年卒世宗親臨其喪哭之慟葬事祠堂皆從官給諡武定十五年圖像衍慶宮明昌五年配享世宗廟

張汝霖

浩之子字仲澤聰慧好學浩嘗稱之曰吾家千里駒也貞元中賜進士第大定九年以汝霖有學術允人望授太子諭德兼禮部郎中進太子少師兼禮部尙書拜參知政事朝奏日世宗謂羣臣曰唐太宗明天子也晚年亦有過舉朕雖不能比迹聖帝明王每思始終如一今年已高敬慎無時或怠汝霖對曰古人云靡不有初鮮克有終魏徵所言守成難者正謂此也上然之二十八年拜平章政事封芮國公世宗不豫受顧命進封莘章宗冬獵汝霖切諫詔答曰卿能每事如此朕復何憂明昌元年卒諡文襄

劉瑋

字德玉咸平人幼警悟業進士舉熙宗特賜及第轉
尚書省都事奏擬經畫軍民田土世宗見其名曰劉
瑋尚淹此乎遷戶部員外郎充使宋國信副使父兄
皆以是官使江左當時榮之明年擢戶部尚書時河
決於衛自衛抵清滄皆被其害詔兼工部尚書往塞
之瑋齋戒禱於河功役齊舉河乃復故明昌三年拜
尚書右丞卒諡安敏

耶律守道

谷神之孫也大定初遷昭毅大將軍授左諫議大夫
世宗錄扈從將士之勞欲行賞而帑藏空議貸民財
以與之守道請出宮中所有勿徵斂以失民望從之
二十年拜尚書左丞相乞致仕世宗曰以卿先朝勲
臣之後特委重任自秉政以來効竭忠勤今引年求
退未得老成人可以代卿者以是難從耳二十六年
復懇求致仕卒諡簡靖

夾谷查刺

隆州失撒古河人狀貌魁梧善女直契丹書大定二
年從伐宋下德順州以功授殿前右衛將軍九年出
爲東北路招討使兼德昌軍節度使到官治有勤績

邊境以安斷獄公平道不拾遺遷臨潢尹兼本路兵馬都總管蕃部畏服改西北路招討使卒

不朮魯端仁

遼城人大定中爲曲陽令修孔廟繕城池置觀稼亭疏靈河之塞時嘉木產於靈河之涯士民頌其爲德政所致

粘割斡特刺

蓋平別里賣猛安人大定七年選授吏部主事九年河南路統軍使宗敘言宋人欲起兵釁求入見世宗遣斡特刺詰之無狀還報稱旨授左司員外郎累遣

刑部尚書參知政事世宗嘗曰爲治之道擇材最難斡特刺所舉者頗稱朕意明昌二年以上京留守致仕承安初起爲東京留守改上京留守晉平章政事封芮國公卒諡成肅

尼庵古鈔兀

曷速館人補元帥府通事從伐宋勇敢善伺敵虛實以此屢捷加忠顯校尉爲蕃部禿里世宗卽位遷輔國上將軍與都統吾扎忽討窩斡事平遷東北路招討使

宗浩

昭祖四世孫大定中同知陝州防禦使事察廉能第一等遷曷蘇館節度使進拜參知政事章宗卽位出爲北京留守有安邊克敵之績封宋國公拜左丞相伐宋之役僕散揆病命浩兼都元帥親赴襄陽卒成和議

夾谷清臣

胡里改路桓篤人也姿狀雄偉善騎射襲猛安大定元年以功授昭武大將軍從紇石烈志寧平窩斡餘黨遷鎮國上將軍明昌二年封芮國公三年從志寧復取宿州四年遷右丞相時有以八陣圖獻者上以

問宰臣清臣對曰本朝行兵惟用奇正二軍臨敵制變以正爲奇以奇爲正故無往不克兵書皆定法難以應變也識者以爲名言

張景仁

字壽甫遼西人爲翰林學士承旨國書與宋往復多出其手世宗嘗稱曰景仁真能文之士遷翰林直學士兼御史大夫時葬元妃李氏於海王莊平章政事烏古論元忠提控葬事都水監丞高杲壽治道路不如式元忠決之四十景仁劾奏元忠輒斷六品官無人臣禮朝廷肅然史臣以儒者之勇許之

耶律德元

遼人大定間知解州軍事時歲旱山谷嘯聚德元曰先除民害然後祈雨因密造賊穴討平之遂祈雨五龍祠雨隨車下

耶律履

金史作移刺履移刺即耶律之轉音也

字履道遼東丹王七世孫父聿魯早亡與平軍節度使德元以履為後方五歲臥廡下見微雲往來天際謂乳母曰此所謂臥看青天行白雲也及長秀峙通悟精歷算書繪事初舉進士惡搜檢煩瑣去之廕補承奉班祇候擢國史院編修官世宗詔問朕讀貞觀

政要見魏徵嘉謀忠節近何故無如徵者履曰忠嘉之士何代無之在用與不用耳章宗為郡王喜讀左傳召質所疑履曰左氏駁而不純尚書孟子聖賢純全之道願留意王嘉納之二十九年進禮部尚書兼翰林直學士特賜大定三年孟崇榜下進士及第拜參知政事明昌三年進尚書右丞卒諡文獻

內族襄

昭祖五世孫幼有志節善騎射多勇略大定初從謀衍討契丹七戰皆捷賊渡霧霰河追及之所駐地多草賊乘風縱火襄亦縱火立空地以俟卒大敗之賊

平論功第一及伐宋爲先鋒間道克清流關紇石烈志寧履行戰地顧謂曰克敵於不可勝之地真天下英傑也師還遷速頻路節度使移曷懶路兵馬都總管襄屢在外任治有異効旣進尙書左丞朝廷褒賞廉吏猶詔天下列其名以示獎勵世宗不豫以右丞相受顧命明昌中代夾谷清臣禦北邊降其部長勒勲九峰石壁契丹德壽隨瑣等據信州叛僞建元曰身聖遠近震駭襄閑暇如平日人心乃安初討契丹自龍虎衛上將軍以下許承制授之襄以爲賞罰之柄非人臣所預賊平請委近臣諭旨使知上恩北部再叛拜襄平章政事屯北京民方艱食乃減價出糶倉粟以濟之或以兵食方急爲言襄曰烏有民足而兵不足者乎民大悅服及用兵勦撫並施北陲遂定拜左丞相襄在政府前后二十年明練故事簡重能斷待屬吏盡禮用人各得所長爲當世名將相大安間配享章宗廟庭

高衍

字穆仲遼陽渤海人白少有能賦聲同舍生欲試其才使一日賦十題未暮皆就彬然可觀登進士乞歸養逾二年方調補瀋陰丞世宗時爲吏部尙書向每

季選人至吏部托以檢閱舊籍謂之檢卷有滯留至
後季猶不得去者衍三爲吏部知其弊歲餘銓事修
理選人便焉

孟奎

字元秀遼陽人大定二十一年進士調黎陽主簿遷
汲縣令察廉改定興令遷中都警巡使時平章政事
完顏守貞禮接士大夫在其門者號冷巖十俊奎其
一也累遷同知中都路都轉運使值旱詔審錄冤獄
多所平反大定初除博州防禦使凡屬縣事應赴州
者不得泊於逆旅以防吏姦遷北京臨潢等路按察

轉運使劾奏監軍完顏訛出虛造功狀詔以奎爲宣

差都提控貞祐初卒謚莊肅

劉光謙

潘州人舉進士天資明敏處事詳雅官至少司農

孫德淵

字資深興中州人大定十六年進士調涑水丞察廉
遷沙河令剛正幹能可任繁劇有盜桑者主逐之盜
自以叉刺足曰秋桑不禁採汝何得刺我訴之縣德
淵曰逐捕而傷瘡必在後今在前乃自刺也盜遂引
服及去官民爲刻石祠之察廉起北京轉運司都勾

盛京通志 卷之三十三
判官累遷昭義軍節度使潞州破被執俄有拜於前者皆沙河舊民也密護德淵由是得脫貞祐二年拜工部尚書是時山東乏兵食有司請鬻恩例舉人居喪者亦許納穀就試德淵奏此大傷名教事遂寢及致仕御史許古論德淵忠亮明敏可大用宣宗嘉納未及用而卒

蒲察鄭留

字文叔東京路幹底必刺猛安人大定二十二年進士累遷北京臨潢按察副使西京人李安兄弟爭財府縣不能決按察司移鄭留平理數月不問會釋奠

孔子廟乃引安兄弟與諸生敘齒列坐會酒陳說古之友悌數事安兄弟感悟誓不復爭改順義軍節度使禁遊食簡兵衛盜息獄空朝廷賜錫宴錢以褒之再改利涉軍詔括馬鄭留使百姓飼養以須御史劾之暨南伐諸路馬瘦惟隆州馬肥獄乃釋大定二年知慶陽夏人犯邊鄭留擊走之至寧元年知平涼府夏人復來攻鄭留招潰卒爲禦守計乃退貞祐二年改東京留守致仕及卒取奏藁盡焚之

裴滿亨

字仲通其先世居遼海天輔間徙居臨潢大定間亨

盛京通志 卷之三十一
充奉職世宗謂曰聞爾業進士其勿忘爲學也二十八年擢第世宗嘉之升爲奉御亨性謹密出入宮禁數年讜論忠言多所裨益未嘗顯示於人一日上問以上古爲治之道亨奏陛下欲興唐虞之治要在進賢退不肖信賞罰薄徵斂而已章宗卽位擢監察御史內侍梁道兒驕橫滿亨劾奏之先是大名府豪猾縱肆莫能制者亨同知府事宣明約束闔境肅然承安中遷中都西京等路按察使時世襲家豪奪民田亨檢其實悉還正之泰和五年改安武軍節度使歲大雪民多凍餒捐俸賑恤又勸僚屬大姓共濟之轉

河東北路按察司卒於官贈嘉議大夫

王庭筠

字子端蓋州熊岳人父遵古登進士官至翰林直學士庭筠生未期視書識十字七歲學詩涿郡王修一見期爲國士登大定進士調恩州判官郡民鄒四謀不軌逃匿筠計捕得之免逮繫千餘人所坐十二人而已再調館陶主簿詔爲應奉翰林文字遷翰林修撰泰和初扈從秋山應制賦詩三十餘首上甚嘉之明年卒詔有司賻喪事求生平詩文藏之秘閣庭筠儀觀秀偉外若簡貴人初不敢與接旣見殷勤慰

藉如恐不及少有可取極口稱讚為文能道所欲言

所著有藜辨十卷文集四十卷詩律深嚴書學米芾

尤精山水墨竹

前志所載今按金史但云河東人攷山西通志及豫省志亦云河東人蓋

州熊岳之說未知何據更俟詳考

烏塘

遼陽人大定間為長子令剖決如流人皆悅服尤善

撫流亡均徭役革包納侵漁之弊邑人為立去思碑

馬知剛

廣寧人仕至鳳翔府尹有詩名

完顏衷

世祖曾孫大定中授代州宣銳軍都指揮使歲旱州

委禱雨於五臺靈潭步致其水雨隨下人為刻石紀

之衷孝弟貞謹深悉本朝婚禮皇族婚嫁每令衷相

之治復有能稱其在寧海蠡州平賦役無擾民為立

石頌遺愛焉

承慶

弟環附

一名琮顯宗子也儀觀豐偉機警清辯性寬厚好學

世宗選進士之有名行者納坦謀嘉教之及長輕財

好施無愠色善吟咏不喜聞人過騎射繪塑之藝皆

造精妙章宗即位封鄆王卒謚莊惠同母弟環性忠

厚寡言內行修飭工詩精騎射書藝章宗卽位封瀛
王卒謚文敬

張汝芳

遼陽人章宗時知沂州治民寬而馭吏嚴深得政體
歷久人猶稱之

胡肇

營州人章宗時爲嘉祥尹興學校禁侵漁獄無留訟
吏不能欺有蝗不入境之異

壽孫

世宗孫一名璫字子瑜資質簡重博學有雋才喜爲

詩工真草書正大初進封密國公璫奉朝請四十年
日以講誦吟咏爲事與文士楊雲翼元好問輩交善
初宣宗南遷璫載其家法書名畫一帙不遺居汴中
口多俸少客至不能具酒肴焚香煮茗盡出藏書相
賞識樂而不厭也至曹王出質璫見哀宗於皇德殿
請代其行哀宗慰止之未幾以疾卒平生詩文甚多
自刪其詩存三百首樂府一百首號如庵小藁

宗道

上京司屬司人系出景祖通周易孟子善騎射章宗
時除西北路招討使故事諸部駕馬八百餘疋宗道

辭不受諸部說服尋除陝西路統軍使以鎮靜得民心特遷三階兼知京兆府事時夏旱俾長安令取太白湫水步迎於遠郊及城而雨是歲大稔永安中知河中府有惠政民立像於層觀以時祀之泰和四年贈龍虎衛上將軍

耶律辨材

履子家義州天資倜儻以志節自負爲中京兵馬副都指揮使宣宗問軍政利弊辨材言將相多非真才遂忤權貴出爲許州兵馬鈐轄

完顏守貞

谷神之孫貞元二年襲謀克明昌初拜參知政事章宗新立頗銳於治嘗問漢宣帝綜核名實之道守貞誦樞機周密品式詳備以對問行之何始守貞曰在陛下勵精無倦耳守貞每論政事持正不阿以夏旱引咎罷知東平府路鐸上書論守貞賢可復用遂召人爲平章政事上嘗言出倫之才難得守貞曰間世之才自古所難然國家培養久則人材將自出矣守貞讀書通法律明習國朝故事金有國七十年禮樂刑政多因遼宋舊制章宗卽位更定修正爲一代法其儀式條約多守貞裁訂故明昌之世號稱清明又

喜推轂善類朝廷正人多所薦引凡有大議及顧問皆傳經以對天下推重之

完顏安國

字正臣其先占籍上京世有戰功安國沉雅有謀尤善騎射明昌元年大石部有乞修歲貢者詔安國使之時北阻鞞迫近塞垣隣部議邀安國俱行討安國以未奉詔爲辭或以危言怵之安國曰大丈夫豈以生死易節暴骨邊庭不猶愈於病死牖下乎衆愧其言而止六年夾谷清臣出兵以安國爲先鋒都統適臨潢泰州屬部叛安國先討定之以功遷東路招討

使承安元年大鹽澤之戰安國功最訖而右丞相襄總大軍遣安國追敵言糧道難繼安國曰人得一羊可食十餘日請驅羊以襲之遂追薄敵降其部長進封道國公安國在軍旅幾十五年號令嚴明指麾卒伍如左右手又善伺敵人虛實及山川險易戰必身先士卒所至輒克諸部入貢安國能一一呼其祖先弟姪名字以戒諭之甚爲鄰國所畏服

幹勒忠

蓋州人習女直契丹字歷兵部樞密院尙書省令史轉大理寺知法遷右三部司正練達邊事承安二年

拜武寧軍節度使致仕忠性敦慤通法律以直自守
不交權貴時譽歸之

高仲論

遼東人承安四年知元氏扶弱抑強政平訟理以俸
餘緝亭於城隅爲秀民肄業之所士之來者雖一藝
一善皆禮接之故多所成就

完顏閻山

蓋州猛安人明昌二年進士累官沁南節度入爲工
部尚書興定中知平涼府有軍功召爲吏部尚書時
選戶部官率舉桑孔之術應詔閻山曰民勞極矣復

用此輩將何以堪識者避之

完顏伯嘉

字輔之北京路訛魯古必剌猛安人明昌二年進士
興定元年官御史中丞宣宗憂旱伯嘉奏曰口者君
象旱者人君自用亢極之應且熒和陰陽宰相之職
不宜歸罪有司三年行尚書省元帥府於河中廷議
欲棄河東徙民以實陝西伯嘉切諫乃止伯嘉純直
不能與時低昂嘗曰生爲男子當益國澤民其他不
可學也元光二年權參知政事行尚書省於河中率
陝西精銳與平陽公史詠共復河東尋卒

溫迪罕達

字子達蓋州按春猛安人性敦厚寡言笑初舉進士
廷試搜閱官易達藐小曰汝欲求官耶達曰取人以
才學不以年貌衆咸異之明昌五年中第興定元年
攝侍御史上疏言遼東興王之地移刺都不能守走
還南京度今之勢當令濮王行省蓋州駐兵合思罕
以繫一方之心又言宰相係天下輕重不宜權攝云
完顏綱

字正甫初爲奉御詔與曹佛留計事佛留每謂屬羌
青宜可願內屬及綱部署陝西召佛留子普賢傳箭
羌中青宜可籍其境土人民詣綱內屬遂以青宜可
爲疊州副總管綱以功遷拱衛直都揮使泰和六年
宋吳曦叛附於金七年宋安丙殺曦遂陷散關綱遣
兵潛自昆谷西山養馬澗入四面攻之復取散關八
年與宋和綱罷兵還京師至寧元年胡沙虎入中都
遷衛紹王於衛並殺綱貞祐四年綱子安和權復州
刺史上書訟父冤略曰先臣綱在章宗時招懷西羌
青宜可等十八部族取宋五州吳曦以全蜀歸朝胡
沙虎無故見殺奪其官爵詔以綱本良將追復尙書
左丞

抹撚史圪搭
臨潢路人幼襲謀克守邊有功泰和六年南鄙用兵
授同知蔡州防禦使戍宿州屢却敵人獲田俊邁十
月僕散揆以行省兵三萬出穎壽史圪搭爲驍騎將
中軍副統克安豐軍戰霍邱花靨功居多從攻和州
中流矢卒史圪搭拳勇善鬪所用長槍長二丈軍中
號爲長槍副統又工用手箭箭長不盈握每用百枝
散置鎧中遇敵抽箭以鞭揮之或以指鉗取飛擲數
矢齊發無不中敵以爲神其箭皆以知創雖子弟亦
不能傳其法在北鄙守厭山營敵尤畏之不敢近

阿喜

宗室子好學問襲父北京路筭栢山猛安聽訟明決
人信而愛之察廉能除彰國軍節度副使改上京留
守判官提刑司奏彰國治狀遷同知速頻路節度使
改歸德軍後以軍功累遷至河南統軍使

完顏氏

遼東人任唐縣令廉能著聲特徵赴闕唐民攀轅泣
留者以千百計

石抹元

字希明懿州路胡土虎猛安人七歲喪父號泣不食

盛京通志 卷之三十三
者數日十三居母喪如成人累官山東西路按察轉
運使初黃摑吾典徵兵東平大括民財衆皆忿怨副
統僕散掃合殺吾典於坐取其符佩之縱恣尤甚元
密疏掃合擅殺近臣無上不道掃合坐誅元移知濟
南府卒元生平寡言笑尙節儉居官自守不交權貴
人以是稱之

完顏弼

本名達吉不蓋州猛安人積功加平南盪江將軍貞
祐初驛召弼赴中都時弼爲雲內州防禦雲內已破
兵弼善馬槊與數騎突出由太原出澤潞會有詔除

定武軍節度使尋爲元帥左都監駐真定弼請明賞
罰招勇敢結堡塞嚴防禦及勸遷都南京阻長淮拒
大河扼潼關以自固宣宗將遷汴弼兼河北西路都
總管三年改知山東西路宣撫副使招撫劉二祖餘
黨孫邦佐張汝楫其後邦佐屢立功元光末累官山
東西路兵馬都總管充宣差招撫使元兵圍東平弼
百計應戰久之乃解圍去弼尋卒弼生平喜讀書閒
暇引儒士雅歌投壺以爲常所辟如承裔陀滿胡土
門紇石烈牙吾塔皆立方面功治東平愛民省費軍
民帖然有古良將風

惟鎔

字子鑄景祖之裔也駢脅多力輕財喜施至寧中守楊文關有功貞祐三年破紅襖賊於大沫涸惟鎔入自北門諸軍繼之生獲劉二祖以功最遷泰安軍節度副使後討花帽賊於曹濟間遷邳州經略使卒

李英

字子賢遼陽人由進士調通遠令蕃部取民物不與直攝之不時至卽掩捕之論如法貞祐初歷監察御史右副元帥术虎高琪辟爲經歷官乃上書高琪曰中都之有居庸猶秦之峭函蜀之劍門也邇者撤居

庸兵我勢遂去今土豪守之朝廷當遣官節制失此不圖忠義之士將轉爲他矣琪奏其書卽以英充宣差都提控居庸等關隘悉隸焉英夜與壯士李雄等四百餘人出城緣西山至佛巖寺令李雄下山招募軍民得萬餘人擇衆所推服者領之時時出戰英被召還遷翰林待制因獻策大槩謂居中土以鎮四方委親賢以守中都立藩屏以固關隘集人力以防不虞養馬力以助軍威愛禾稼以結民心明賞罰以勸百官選守令以復郡縣并州縣以省民力頗施行之完顏鐵哥

性淳謹貌雄偉襲父速頻路易懶合打猛安授廣威將軍御下有恩察廉除臨海軍節度副使伐宋有功兵罷遷同知臨潢府事貞祐二年入衛中都遷東北路招討使兼德昌軍節度使蒲鮮萬奴在咸平忌鐵哥兵強牒取所部騎兵二千又召泰州軍三千及戶口遷咸平鐵哥察其有異志不遣宣撫使承充召鐵哥赴上京命伐蒲與路既還適萬奴代承充爲宣撫使遂殺鐵哥朝廷知其以忠遇害謚勇毅僕散安貞

揆之子貞祐二年爲山東路統軍安撫使時楊鞍兒

攻渤海縣僭號改元天順陷登萊沂密等州欲取益都安貞連破之又破劉二祖郝定等遂平山東及伐宋每獲壯士輒釋不殺無慮數萬因用其策輒有功嘗曰三世爲將道家所忌自忠義揆至安貞凡三世大將安貞果爲執政所忌誣殺之

高竑

渤海人以廕補官調貴德縣尉提刑司舉任繁劇遷奉聖州錄事察廉遷內黃令進同知大名府以功遷三官貞祐二年遷河北西路按察轉運使致仕完顏合達

一名瞻字景山貞祐三年授臨潢府推官權元帥右
監軍興定五年知延安府上言諸軍官以屢徙往往
不知所居地形險易緩急之際恐致僨事自今乞勿
徙從之十一月夏人攻安塞堡合達曰先破夏人則
北兵易爲力於是倍道兼進夜襲其營夏人大潰延
安遂固元光二年河中已破合達復取之正大二年
七月陝西旱甚合達齋戒請雨雨澍是歲大稔民立
石頌德延安旣殘毀合達令於西路買牛付主者招
集散亡助其耕墾自是延安稍復耕稼之利八月鞏
州田瑞反合達移文罪止田瑞一身餘無所問不數

日賊黨殺瑞以降合達如約撫輯一州以寧二年徵
拜平章政事芮國公七年十月合達及樞密副使蒲
阿解衛州圍哀宗九年兩省軍潰於陽翟之三峰山
合達以數百騎走鈞州城破見殺合達熟知敵情習
於行陣且重義輕財與下同甘苦遇敵則身先之衆
亦樂爲之用元人招降至以合達黃河並稱其爲良
將信矣

龐鑄

字才卿蓋州人少擢第仕有聲南渡後爲翰林待制
遷戶部侍郎博學能文工詩造語奇健不凡世多傳

之

劉仲尹

益州人登進士以潞州節度副使召爲都水監丞能折節讀書詩詞樂府俱極蘊藉有龍山集傳世

李經

字天英錦州人詩意刻苦能出奇語李純甫見之曰今世太白也再舉不第拂衣去南渡後其鄉帥有表至朝廷士大夫識之曰此天英筆也朝議武功就命倅其州後不知所終

蒙古綱

咸平府猛安人承安五年進士貞祐初自請招集西山兵民招捕有功遷太子左諭德興定元年徙知東平府事拜右副元帥權參知政事行尚書省三年綱遣行樞密院事王庭玉討擒張林詔以綱與庭玉保全東平各遷一階元光二年以邳州經略司隸綱綱御下嚴信賞必罰邳州不樂屬綱且謀叛納合六哥等遂殺綱於行省

何搏霄

北京人好施與鄉里以善人稱孫道忠仕金爲北京留守

元

劉潤

瑞州人歲庚辰木華黎取邢州舉潤為都統使軍旅之事多與謀焉事定改署州錄事歷鉅鹿內邱兩縣提領皆有惠政子秉忠仕至太保為元名臣卒贈太師諡文正仁宗時又追封常山王按元史秉忠大父澤以下即為邢州人

劉世英

弟享安附

遼東川州人時金元爭河朔民物空竭世英言於木華黎曰建國以民為本今殺掠殆盡異日孰給轉餉

收恤存亡此其時也遂授以絳州節度使兼行帥事弟享安嗣其職累立戰功有喬長官與享安爭功未幾攻城喬為砲所傷享安負之以出喬感愧享安從軍十年所獲金帛悉推與將佐故士卒咸樂為用何實

字誠卿北京人父道忠仕金為北京留守實少孤依叔父居家人常於臥內見青蛇蜿蜒駭而熟視乃實也及長多雄略善騎射通諸國譯語木華黎與論兵事奇變百出大加稱賞遂引見太祖選充前鋒時張致復據錦州實與賊遇於神水縣挺身陷陣以功為

帳前軍馬都督彈壓略地攻城累功至元帥左監軍
癸未走武仙於邢州士民按堵戍邢復多善政邢民
敬之如神明太宗欲授以征行元帥實固辭乃賜白
貂帽減鐵繫腰貂衣一襲弓一矢百遣歸
石抹孛迭兒

契丹人太祖時隸木華黎麾下從平高州授左監軍
佩金符與北京都元帥吾也兒分領錦州紅羅山北
京東路漢軍二萬以功爲霸州等路元帥領黑軍鎮
固安既至令兵士屯田且耕且戰披荆棘立廬舍數
年之間城市完固癸巳從討萬奴於遼東平之孛迭
兒始從征伐及後爲將大小百戰所至有功

奧敦希愷

女直人父保和以元帥領保定順德諸道農事凡闢
田二十餘萬畝致仕卒希愷襲勸農事郡縣水旱力
請蠲租及調知冀州變健訟之俗奪蒙古所侵民田
歸於民陞河中知府秩滿歸調以不見權臣阿合馬
降知景州

田雄

字毅英北京人以驍勇善騎射知名從木華黎征興
中廣寧諸郡定府縣二十有九累功賜金符召爲御

前先鋒招納河南降附民皆按堵而別部將縱兵虜掠雄力爲救護至出已財與之民免於害癸巳授鎮撫陝西京兆等路事招徠安集教民力田京兆大治卒封西秦王子襲職

李守賢

字才叔大寧義州人初與兄庭植歸木華黎太祖命庭植爲右副元帥守賢授錦州臨海軍節度觀察使遷河東南路兵馬都總兵鎮河東太宗南伐道平陽見田野不治以問守賢對曰民貧乏耕具詔給牛萬頭仍徙關中人民墾地河東時河中未下守賢請自

北面鑿城先登城果下破趙雄兵留屯嵩汝金兵十萬保少室山守賢以三千人破之攻河南降其渠帥洛西遂定子穀亦以功累官至河東路總管孫伯溫死於平陽之難見孝義志

耶律楚材

字晉卿遼東丹王突欲八世孫金尙書右丞履之子也身長八尺美髯宏聲天資英邁曼出人表博通天文地理曆律術數及釋老醫卜之說金貞祐三年爲中都行省員外郎中都陷太祖召見處之左右從征西域製庚午元曆上之太祖每征必命之卜多奇驗

甲申兵次東印渡國鐵門關侍衛見一獸如鹿而馬尾作人言曰汝主宜早回太祖以問楚材對此角端也解四方語好生惡殺今大軍征西已四年上天降符以告陛下願承天心宥此數國人命太祖遂還太宗卽位楚材奏諸州縣長吏專理民事萬戶府專總軍政課稅專掌錢穀各不相統攝著爲令權貴不得志遂爲石抹咸得卜等構陷而太宗獨察其誣及咸得卜獲罪太宗命楚材鞫治楚材請寬之太宗私謂近侍曰楚材不較私讐眞長者汝曹當效之太宗至雲中諸路所貢課額銀幣及倉廩物料文簿具陳於外悉符楚材元奏之數笑曰鄉何使錢幣流入如此卽日授以中書省印事無鉅細悉以委之時民多誤觸禁網國法無赦令楚材議請肆宥條便宜十八事太宗悉從之金汴京陷速不臺請屠汴楚材馳見太宗曰得地無民將焉用之且弓矢甲仗金玉等匠及官民富貴之家皆聚此城殺之則一無所得是徒勞也於是百四十餘萬戶皆得保全又求得孔子五代孫襲封衍聖公付以廟地及楚材奏定賦稅朝臣皆謂太輕楚材曰將來必有以利進者則以爲重矣楚材又奏制器者必用良工守成者必用儒臣請校

試之乃命以經義詞賦論分爲三科儒人被俘爲奴者亦令就試其主匿弗遣者死得士凡四千三百人免爲奴者四之一楚材又請一衡量立鈔法定均輸庶政略備民稍蘇息太宗嗜酒楚材屢諫不聽乃持酒槽鐵口以獻曰此鐵爲酒所蝕尙致如此而况五臟太宗悟賞以金帛太宗疾篤脉絕六皇后不知所爲召楚材問之對曰今任使非人賣官鬻獄囚繫非辜者多宜赦天下后亟欲行之楚材曰非君命不可頃之太宗少蘇后以爲言乃首肯赦發而脉生疾愈楚材以太一數推之不宜田獵爲左右慙慙遂出獵

尋崩皇后乃馬真氏稱制奧都刺合蠻專政用事有旨凡奧都刺合蠻所建白令史不爲書者斷其手楚材曰國之典故悉委老臣令史何與焉事若合理自當奉行如有不可死且不避况斷手乎后不悅楚材憤悒而卒有言天下貢賦半入其家者后命近臣覆視之惟琴玩十餘及古今書畫金石遺文數千卷而已楚材爲相二十年正色立朝不爲勢屈每陳國家利病生民休戚辭色懇切太宗嘗曰汝又欲爲百姓哭耶楚材每言興一利不若除一害生一事不若減一事人以爲名言至順初贈太師追封廣寧王謚文

正所著湛然居士集十四卷

烏古孫澤

字潤甫其先女真烏古部人後徙大名至元十四年元帥唆都辟澤爲提控案牘十月唆都拔興化欲屠城澤力諫止之十五年改興化軍爲路授澤行總管府事民迎候於道曰是吾復生之父母也喜極繼以泣郡新殘於兵白骨在野首下令掩埋兼衣食其流離之民有棄子於道者置慈幼曹以育之又興學校行鄉飲酒禮士咸知向慕以澤與常袞方儀並肖像祠於學宮二十一年調永州判官及桑哥考校錢穀

永州獨無增羨要束木承風旨拘繫澤明年桑哥敗要束木誅始得釋從征海南黎以功授廣西兩江道宣慰副使歲飢卽發粟以賑行省平章哈剌孫知其愛民不以專擅罪之邕管徼外蠻數爲寇澤循行阨塞置屯列堡募民以守又陂水墾田收穀爲軍儲邊民賴之御史臺言澤奉使知大體如汲長孺爲將計萬全如趙充國遂擢海北海南廉訪使澤相雷州西北築堤浚渠以資灌溉民歌之曰烏鹵爲田兮孫父之教渠之泱泱兮長我秔稻自今有年兮無旱無澇至大元年以母老求歸養卒謚正憲

趙良弼

字輔之女直人愨之子初舉進士教授趙州世祖在潛藩召對稱旨擢爲邢州幕長區畫有方邢遂大治已未七月世祖南征召參議元帥事兼江淮安撫使良弼親執桴鼓爲士卒先五戰皆捷所至禁焚舍殺降宣布恩德民皆安堵及參議陝西省事蜀人費寅以私憾誣廉希憲商挺在京兆有異志引良弼爲徵帝詰良弼良弼泣曰二臣忠良願剖臣心以明之帝切責良弼至欲斷其舌良弼誓死不變帝意解費寅卒以反誅至元七年奉使日本至金津島途津守延

入板屋太宰府官陳兵四山脅取國書至於再三良弼曰不見汝國王寧持我首去書不可得也日本知不可屈遂遣使人覲良弼復命帝曰卿可謂不辱矣後帝將討日本三問良弼皆力言勿擊便從之十一年同簽樞密院事屢以疾辭得旨居懷孟良弼有地三千畝乃折爲二六與懷州四與孟州皆永隸廟學以贍生徒嘗言人情之難制者怒爲甚必克已然後可以制怒必順理然後可以忘怒能忍所難忍容所難容事斯濟矣卒封韓國公謚文正高宣

遼陽人太宗時以元帥從睿宗攻大名宣進曰今來
弔伐願勿嗜殺人從之及城破兵不血刃民心悅服
又從破金兵三峰山降宣者二千餘戶以宣爲都總
管統之賜金符令世其職卒封營國公諡簡僖

趙炳

字彥明惠州人幼失怙恃鞠於從兄歲饑遇盜將殺
其兄炳年十二泣代死盜驚異舍去甫弱冠侍世祖
於潛邸以恪勤蒙眷署爲州長已未南伐俄北方有
警括兵斂財燕薊騷動王師北還炳遠逐中途具以
事聞世祖嘉之追所括兵及財物歸於民中統元年

判北京宣撫司北京控制遼東番夷雜處號稱難治
時參知政事楊果爲宣撫使聞炳至喜曰吾屬無憂
矣三年括北京鷹坊等戶爲兵蠲其賦令炳總之濟
南妖人作亂賜炳金虎符加昭勇大將軍濟南總管
炳至罪止首惡餘黨解散遷遼東提刑按察使豪猾
屏跡至元九年授京兆路總管兼府尹皇子安西王
開府於秦多納炳言免逋捐賦秦民大悅王薨炳被
旨入見具陳民間利病因言王薨之後運使郭琮郎
中郭叔雲竊弄威柄恣爲不法帝卽令乘傳偕勅使
往按至則琮等假嗣王旨收柄妻孥徒柄等於平涼

北崆峒山炳子仁榮訴於上上馳使脫炳琮等醉使者以酒遣人毒炳於獄其夜星隕聲如雷帝聞之械琮等至親鞠得實命仁榮手刃琮叔雲於東城詔雪炳寃諡忠愍

高天錫

宣子事世祖潛邸甚見親幸授父官尋改燕京諸路總管按察司副使天錫與丞相言曰農桑衣食之本不務本則衣食不給教化不興丞相以聞遂命立司農司以天錫爲中都山北道巡行勸農使遷司農少卿兵部尙書追封營國公子諒官封亦如之

王珣

本耶律氏金末避難遼西家義州更姓王武力絕人善騎射後得古刀於凌水有驚輒鳴故所向皆建奇功賜虎符充兵馬都元帥鎮遼東爲政簡易時人倚重

王榮祖

字敬先珣長子語音如鐘勇力絕人襲崇義軍節度使入朝帝聞其勇選三力士與搏皆應手而倒從征高麗破十餘城降天龍諸堡賜金幣遂移鎮高麗謁里只

盛京通志 卷之三十三
女直人幼穎悟長以孝友聞至元七年命爲監戰以
所領軍圍襄陽峻都劉國傑等皆隸麾下攻樊城率
衆先登受賜悉分將士後從伯顏南伐屢有功及宋
降伯顏命謁里只監守其宮號令嚴肅秋毫無犯拜
鎮國上將軍

劉國傑

字國寶本女直人姓烏古倫後改劉氏國傑貌魁雄
善騎射從伯顏力戰有功加懷遠大將軍賜號霸都
霸都者勇敢之稱也國傑行二因號爲劉二霸都至
元二十五年平湖南盜詹一仔餘衆悉降或請盡阬

之國傑曰多殺且不可況殺降耶乃相地爲三屯
其衆屯守以備賊後皆爲良民江西盜起國傑下令
往擊賊諸將皆曰此他省盜我勿與聞國傑曰縱敵
生患患將難圖豈可以彼此言耶遂進兵連破之又
破永州盜李末子干七及上思州黃勝許取賊巢地
爲屯田募慶遠諸獯人耕之以爲兩江蔽障上遣使
卽軍中賜以玉帶元貞元年加湖廣行省平章政事
經營茶陵衡柳桂陽之地東盡交廣西亘黔中皆設
屯戍守之盜賊遂息大德五年羅鬼女子婉節反賊
多健馬官兵戰失利詔國傑討之國傑令人持一質

布釘其上俟陣合棄質偽遁賊果逐之馬遇質皆倒
遂大敗賊擒斬蜿蜒節臺臣言國傑在軍中每以家財
賞士帝命倍償之國傑常言吾爲國宣力視死如歸
雖身棄草野不恨何必馬革裹屍還葬哉平日推誠
待士故戰則有功江西湖廣廣東雲貴諸盜以次削
平卒贈司徒封齊國公謚武宣

滅里干

女直人祖高闢兒從太祖征西域復從濶出太子察
罕那演連出征累有功授金符總管父元長襲職從
攻樊城征常州皆先登後從太子脫歡征交趾中毒

矢死滅里干初襲父職領兵鎮廣東元貞元年移戍

袁州盜陀頭以衆犯境悉勦除之復平南恩盜還歿

於袁贈懷遠大將軍渤海郡侯

按滅里干前志及江西志俱以爲高闢兒

子今改正

耶律希亮

字明甫楚材之孫鑄之子九歲師北平趙衍未浹旬

已能賦詩至元八年授符寶郎十一年旣平宋世祖

命希亮問諸降將日本可伐否皆對曰可希亮奏曰

宋與遼金攻戰且三百年干戈甫定人得息肩俟數

年興師未晚世祖然之累遷至吏部尙書至大中授

盛京通志 卷之三十三 三
翰林學士承旨知制誥兼修國史乃類次世祖嘉言懿行以進希亮性至孝阿里不哥反時脅之西行困厄遐方家貲蕩盡僅藏祖考畫像四時陳列致奠朔漠之人咸共嘉嘆雖疾不廢書史或中夜起坐取燭以書所著詩文三十卷曰懷軒集卒封漆木郡公謚忠嘉

耶律有尙

字伯強遼東丹王十世孫祖父官東平因家焉有尙篤志好學受業許衡遂於性理而尤以誠爲本至元十年衡還鄉里朝廷乃以有尙爲助教嗣領其學事

久之出知薊州以寬簡得民召爲詹事長史復除國子監司業時學館未建師弟子皆寓居民屋有尙屢以爲言二十四年朝廷乃大起學舍始立國子監及監官而增廣弟子員於是有尙陞國子祭酒儒風爲之丕振歷昭文館大學士前後五居國學其立教以義理爲本而省察必真切以恭敬爲先而踐履必端懃身爲師表數十年海內宗之猶昔之宗衡也以老致仕卒年八十六謚文正

王明之

蓋州人累官翰林學士追封太原郡公

李希賢

遼東人延祐間爲臨武令愛民禮士獄訟清明常語人曰君子學道則愛人自然生明能斷去任後邑人立石頌德題其額曰學愛

王克敬

字叔能大寧人幼奇穎丞相完澤一見許爲令器累官江浙行省左右司都事時番陽大饑總管王都中出廩粟賑之行省欲罪其擅發克敬曰番陽距此千里比待命民且死彼爲仁而吾屬顧爲不仁乎都中因得免拜監察御史遷左司都事時英宗厲精圖治

丞相拜住請更前政不便者會議中書堂克敬首言江南包銀民貧有不能輸者有司責之役戶當罷兩浙煎鹽戶牢盆之役其重者尤害民當免從之泰定中叅知政事行省遼陽俄除江南行臺治書御史又遷淮東廉訪使以正綱紀爲已任不縱貪墨不阿宗戚聲譽益著元統初爲浙江行省參政年五十九卽請老謂人曰穴址而峻墉必危再實之木必傷其根無功德而忝富貴何以異此又曰世俗喜言勿認真此非名言臨事不認真豈盡忠之道乎克敬喜讀書有得輒以筆記久之成帙所著詩文奏議傳於世卒

封梁郡公謚文肅子時以文學顯以翰林承旨致仕
溫迪罕完

蓋州人至元元年知趙州州當子午要途所費不貲
完從容辦集民不爲擾采地八百畝佃者輸租畝三
斗丙子秋旱完惻然不忍民饑皆除之

崔敬

字伯恭大寧惠州人至元六年拜監察御史時旣毀
文宗廟主又徙文宗后於東安州而放其子燕帖古
思於高麗敬奏請迎歸太后太子以全母子之情盡
骨肉之義又上疏諫天子巡幸上都宜御內殿與宰

臣謀治道究古今盛衰之由及帝數以歷代珍寶分
賜近侍又以恩不可濫乞追所賜以待有功是年出
僉山北廉訪司事至正初遷河南又遷江東所至抑
豪強惠下窮洗冤滯興學勸農百廢具舉十一年遷
同知大都路總管府事直沽河淤數年委敬治之不
三月告成咸服其能十七年分省陵州時盜據齊魯
敬兼領兵刑戶工四部事供給諸軍事無不集又命
王恪等諭田豐李秉彝悔過自新山東郡邑之復敬
策居多卒謚忠敏

蕭達

遼人爲輝州達魯花赤察民隱賑貧乏抑豪強刊吏蠹政平訟理民賴以安至元間卒於官葬北里社

馮驥

字致遠遼西人任撫州路總管不事苛察至正甲申乙酉歲饑煮粥給餓者復請鈔五十萬錠賑之又勸富室以貸不足民賴全活

張庭珍

字國寶臨潢全州人父楫金爲北京都轉運使因家北京憲宗卽位以庭珍爲必闕赤時高麗徙江華島命庭珍問其故其王言大軍歲入侵掠避而走險不得已也因厚賂庭珍庭珍却之歸以狀聞帝爲禁戍兵無擅入其地高麗遂安至元六年安南入貢不時以庭珍爲安南國達魯花赤由大理至安南世子光昞立受詔庭珍責之光昞慚憤使衛兵露刃環立庭珍解所佩之刀坦臥室中曰聽汝所爲光昞及羣下皆服遂入貢及徙伐宋累功至南京路總管河決大康庭珍括船縛筏載糗糧四出救之全活甚衆庭珍性清慎丞相伯顏嘗語人曰諸將渡江無不荒貪惟我與國寶始終自守聞者以爲知言

張庭瑞

字天表庭珍之弟幼以功業自許中統二年戍守青
居有功及圍重慶兵仗糧儲皆倚以辦蜀平陞諸蠻
夷宣慰使礮門羗入市爭價殺人被繫羗酋謀劫之
已斷繩橋魚通司來告急左丞汪惟正問計庭瑞曰
羗俗以鬪殺爲勇今如蜂毒一人而卽以門墻之寇
待之不可宜遣使往諭禍福彼自回矣惟正卽以庭
瑞爲使果不勞兵而罷都掌蠻叛命庭瑞討之蠻聯
松枝爲牌自蔽庭瑞所射矢出其牌半斨蠻驚曰何
用弓矢如此之力卽請服
塔失不花

高天錫之孫成宗命世其祖父官以居喪辭延祐四
年帝謂之曰汝祖嘗爲司農今復以授汝遂遷榮祿
大夫大司農英宗居東宮塔失不花撰前代嘉言善
行名曰承華事略并畫幽風圖以進帝覽而嘉之命
置圖書東宮俾太子時時親省

陳資壽

錦州永樂人任寧鄉縣元末兵燹之餘勦羣寇輯遺
黎歷官至昭毅大將軍

明

王麒

建州松花江人壯勇善射建文時從燕兵南下小河之戰矢不虛發累陞遼東都督同知

童信

三萬衛人建文初從燕兵南下勇敢負氣每戰輒有奇功累官至都督

畢恭

前屯衛人官至署都指揮僉事掌都司印撫士卒革奸弊廣屯田興學校政平事理人咸稱之所著有邊

城吟稿

陳鑑

蓋州人正統間進士賜及第官翰林學士使朝鮮有皇華集行世官祭酒陞禮部侍郎

張升

定遼中衛人聰明有雋才舉正統丁卯鄉薦任本學訓導後改萬全都司儒學訓導學宮舊有井不甘升疏之列甚土人呼曰張先生井所著有裔菴稿行於世崇祀鄉賢

李榮

寧遠衛指揮使正統間守備塔山遇警選精騎追至和州大戰被圍於長坡自午抵暮不少挫敵遂去翰

林學士仇謙使朝鮮聞而嘉之爲賦塔山李將軍歌
范 廣

寧遠衛指揮僉事原籍丹徒人有膽力善騎射正統
間以功陞指揮同知後累立戰功陞都督同知賞金
帛賜玉帶蟒衣

賀 欽

其先定海人因戍家廣寧成進士聞陳白沙先生議
論卽執弟子禮授戶科給事中直言敢諫嘗書鄙夫
章於壁以自儆成化四年以疾歸欽不務博覽靜思
默識反身實踐每教人讀白鹿洞教條嚴爲己爲人

之辨弘治改元大臣交薦授陝西左參議以母老固
辭且陳四事一曰資真儒以講聖學二曰薦賢才以
輔治道三曰遵祖訓以處內官四曰興禮樂以化天
下其云處內官者指王振曹吉祥汪直梁芳輩陷君
誤國蠹政殃民內不可使預大政外不可使掌兵權
尤爲切要疏入報聞欽讀書之暇釣游凌谿徜徉自
得有醫巫閭集行世沒後鄉士夫爲之立祠於釣臺
張 鉞

義州人弱冠卽以詩名景泰間領山東鄉薦任順天
府通判陞解州知州致仕篤行古道表率鄉閭出其

門者多致通顯

顧能

定遼前衛人性剛直與人寡合由進士授戶部主事有清操生平不妄受一錢天順間通州收糧盡革諸弊淮安收錢一年錢抵九年遂陞本部員外郎成化初天下清官四員能居都御史楊繼宗之次刻名於便殿金柱上

耿賢

定遼前衛人由指揮陞都指揮僉事掌都司印備禦金復鐵嶺尋守備寧遠轉右參將分守開原善撫士卒不妄交際致仕歸所屬憫其清苦各餽金幣賢悉分之軍士後卒葬城東杏林山與其師顧能墓相近詩人弔之以爲師弟雙清云

胡深

定遼後衛人登天順進士官至監察御史剛正嫉邪不避權倖成化間陳弭災四事上嘉納之劾大學士商輅之失節大理卿程信之剛暴禮部尙書姚夔之黷貨疏再上爲忌者所中謫湖廣黔陽縣丞後陞廣西鬱林知州卒於官祀鄉賢

莊鑑

遼東人襲右衛指揮使驍猛有胆決成化十九年爲大同西路參將亦思馬因入寇邀其歸路戰牛心山寇遂遁鑑所部並無亡失後鎮宣府以才與大同總兵官張俊易鎮卒

陳壽

字本仁寧遠人成化八年進士授戶科都給事陞副都御史巡撫延綏敵兵入掠擊却之未幾火箭脫羅糾衆大至壽自出帳擁數十騎據烏皮几指揮敵疑之遂引去旣而授諸路將領方略邀擊之皆大捷尋以右副都御史巡撫陝西盜賊屏息廉名尤著夏大旱戒刑清獄齋心誠禱天乃雨歲大熟累陞南京副都御史刑部尙書致仕卒年八十四

潘輔

廣寧人癸丑進士授順天永清縣尹有冰蘖聲時盜賊竊發境上緝捕有方畏威遠遁卒於官

孫磐

定遼右衛人弘治丙辰進士初試政卽上疏乞考察兩京科道官知陵川縣抑豪強恤孤弱尤殫心風教徧立社學集養正篇小四書養蒙大訓悉刊布之陞吏部主事上罷各鎮中官監軍疏時逆瑾專政深嫉

之遂免官尋起河南按察司僉事值流賊猖獗資給軍餉鎧杖以至保障留都遏賊東殄磬之籌畫居多

王春

遼東廣寧左屯衛籍登丙辰進士授翰林院檢討陞周府長史時宗室以巡撫勾稽廩祿聚衆往譟於門後因治兵備他盜宗室疑之皆挾兵自衛春啟王編諭其故且止巡撫兵衆乃安有復菴詩集行世

徐景嵩

定遼中衛人正德間進士尹咸寧陞戶科給事中彈劾不避權貴歷河間知府山西按察副使

傅鑰

字希準遼東廣寧人正德間進士授給事中嘗論邊事爲尚書王瓊嘆服會宣大將領失利亡卒甚多廷議遣鑰覆視上曰是嘗言邊事者稱是選矣鑰至鎮考治甄別不隨不苛得實以報嘉靖間累陞山西按察使用法平恕兼得大體富民某某殺人當死以貨免鑰收鞠之寘於法知縣某主簿某皆良吏爲奸人所構事下按察司或謂鑰云是當道所欲入也鑰曰法如此可枉徇乎竟白之終河南巡撫

陳宗

遼海人初城南池蓮忽生黃花一莖其大如盤色甚鮮麗術者異之曰城中當出奇士未幾宗生四歲能書五歲屬文號神童尤長於篆刻十八登進士任刑部主事尋陞尙寶寺少卿卒

崔哲

遼陽進士正德初知威州以德服遠邊陲無倣後改任澤州撤淫祠廣儲蓄善獎進後學課試皆有程期

范總

字平甫瀋陽衛人嘉靖中進士任河南府知府值歲荒多方賑濟巡撫寧夏剛斷明察清查侵盜糧草裁

革冒功陞賞弛廢振興邊境肅然

李成梁

鐵嶺人字汝器出生員襲指揮僉事隆慶丁卯陞副總兵協守遼陽萬曆甲戌晉左都督鎮遼總兵次年封寧遠伯子襲蔭前後鎮遼二十八載蒞任最久著在國史加太傅累疏乞休卒年九十三賜祭葬

李景登

廣寧人進士萬曆間任猗氏縣才敏氣恬不以崖岸自異請除荒地課贍書生陞吏部主事出知漢中府水操嚴潔明敏果斷蒞任三年案無留牘獄無沉滯

王守道

遼東左屯衛都指揮使萬曆十一年任山海路叅將十二年九月蒙古兵侵寧前公率本路併延綏兵東援却之

朱梅

號海峯前屯衛人厚重渾樸御事精確初爲山海裨將訓練有術綏輯多方凡所宣布曉諭士卒莫不帖服迨後總鎮山海在任頗久加秩世襲及卒晉階諭祭

修卜年

遼陽人萬曆間進士知河間縣節用愛人除門則俵馬大戶三害邑人立祠祀之

劉耀武

遼陽舉人任香河令重學輕刑爲政務順民心民愛慕之

劉士璉

遼陽進士崇禎間任平陽府推官慈祥豈弟多所平反

甯浩

遼東監生知鳳縣剛果有爲捐俸以修櫺星門鑿泮

池引水其中造銅祭器子杲仕至都御史

劉世治

遼東貢士任廣昌令撫恤羣黎加意學校凡所營繕并不擾民

祖大弼

寧遠人總兵寧夏鼓勵士卒戰勝攻取囊無餘資

黃得功

遼將也崇禎中屢破流寇寇避其鋒

盛京通志卷之三十三

